

NTO OSUULU ANYU ONOOKUXA

MUKHORA WA NWANANI AYA



Ntoko kweekwe, kooxeleliwa, ewoora emosa wala piili. Pastore oroovenya, khwira, “Vano, kintthuna kooruuheleni ohoolo wanyu nyuwo othene Mwenye Branham ooxeleliwa.” Ahe, miyo kihaana itthu sinci-ene soowiira tivo miyo—miyo kinnipisa imaara kamosa-kamosa. Masi okathi ula nkaawerya osyaka. Waari mwaha wa okathi wiirale ekwaha ela. Kinoowerya wootherya okathi wira kiikhalihe naxariya. Kaahaana wunteerya, Munna Rose, vakhani paahi. Mooxeliwa, Munna Rose. Ni kinnithapa okhalana voosis’ula va, Munna Rose mulopwana ni Munna Rose muthiyana, ni Munna Sharrit, ni axinna anci-ene, nyuwo atthu ooreera murima vate vo.

² Kihiiwa wira, ookhala okihimenrye, “Yaruparu epula oPhoenix, atthu othene anikhala voolilini,” orukunuwa iwo, moosuwela. Nihiku nlo kinoophwanya yolya mahala. Kinileeliwa wira nyuwo pooti okhalana yolya mahala khula nihiku nsuwa nihinaarya aya. Kinrowa oweha olelo, kaalokihe mwaha wa yeeyo.

³ Miyo kaamulaleerya nsana ohiyu, ekereja eyo. Vekeekhai nkinuupuwela nsina naya. Nto siiso hiyo naahikhalana okathi wooreera, nsana ohiyu, vamutekoni w’okokhorela. Wu ni Munna Outlaw, ni nirowa oTempe, ni ninniviriha okathi wooreera moopatthanani mu. Ni kinwehererya okumana n’axinna ala othene arumeyi vamuthukumanoni, wira nikhalane okathi wo okawana, Munna Rose, ni ovaanela mmosa ni mukhw’awe. Nto ti yeeyo enrweelaaka, wira kikhane opatthana. Ni hiyo naahikhalana . . . oweha muttala ahu ni ophwanya mapuro manci-ene. Masi miyo kuupuwela wira ola waari okathi muulupale, okhala wira kiha—kihaasuwela atthu oohiya-hiyana, kiwerya owoona ni okawana itthu.

⁴ Imaara sikina olaleerya, khula murumeyi onkhala oohiiwiwa oratteene, enamuna emosa wala ekina. Imaara sinci-ene, atthu anookuxa etthu munihimyaanyu ni paahi . . . Eyo yuuramelaru vakhani wa yaawo, vano awo anoohimya siiso. Nto mutthu mukina onaakhela, enimuuramelaxa vakhani. Naanaanoru, ari ota wa ephiro.

⁵ Vano—vano hiyo, imaara sinci-ene, olaleya, miyo ntoko wira kinnipwapwela miromolelo ni mitthenkeso ni itthu siiso. Mwa okathi uwo, atthu animwiira nto, “Munna Branham ookhalana nthowa ni mutthenkeso.” Ti yoovonyeya. Miyo nkirina nthowa ni mutthenkeso. Masi okhala wira imaara sinci-ene atthu anlipa

ni mutthenkeso yoowo, moone, ni okhaliha miroromelo saya sothene mwa yoowo omuhiya Kristu.

⁶ Awo antthuna yoone mamempuru akavi anweryaaya waaroiha mutthenkeso yoowo. Vano, eyo ti yooreera saana. Miyo—miyo...Eyo ti yooreera. Kinooowa wira khula mutthenkeso waahaana okhalana mamempuru othene onweryaaya. Eyo eri saana. Masi mwaaphiyeryaka nipuro no waakuxa oohirukunxa murima ni ohelaxa ecalelo mwa yeeyo ohiya ohimyaxa Erooho Yoowaarya, ntoko Munna Rose saahimyaawe va okathi vakhani ovinre, n'itthu nto, vano muwi—munoowuupuweliha atthu, “Hiyo niniira mpannta wa *ela*, ni hiyo niniira mpannta wa *ele*.” Vookiserya, hiyo othene niniira mpannta wa Muluku. Munnona?

⁷ Vano, miyo kaamonne mutthu arowaka omuratthini mmwaatiyani...Ni kinkhala vakhiviru ni muro oIndiana, Muro Ohio, ni kiri vakhiviru va ikhwarara. Nlo nipuro nootakhalaxa, ikhwarara iyo, okhala wira sinimoomalamalihani naanaanoru. Mwaphiyerya-ru omorela vakhwararani vale, khiwaavo mwaatiya onwerya ovira, okhala wira ti siiso, ekhuruwelo ntoko ya imeeturu muloko ni piili wala muloko ni thanu orowa vathi, vano nto yookhala eyuupuru yuulupale vathi, yeeyo emmana vamwala, epantte ya mwala vale. Ni kinoona wira ma—ma—mawipi, mawipi oowali, ampwaphwaruwa vathi va ekhwarara wa imeeturu muloko ni thanu sa erakamelo, moone, vaavo ammanaaya vathi, n'utthikela-tho osulu. Vano nto anoorowa eveveleyeka siiso, ni ovira mmukhukuni muulupale antthikaaya orina ntoko imeeturu muloko ni thanu natthaaru wala miloko miili wiixa waya. Ni muhina mmwe yookhala eyuupuru enrukunxela epantte *ela* nno, ni okumiha ni oviriha mmukhukuni. Khiyaavo enamuna y'ovuluwa, moone.

⁸ Mulopwana mmosa aahimora nno okathi uwo owanrene exaketa yo woopola ekumi. Etthu iyo yooniwe paahi okathi owo omonryawe, *siisaale*. [Munna Branham onkumaniha ikatha sawe—Mol.] Hata exaketa eyo yo woopola ekumi, evirelo ele ya maasi yoowoopiha khimusamiha naanaanoru. Ni khonaphwanyawe. Ni khesuweliwe-tho sa yoowo. Owo aarohameela mmiyalani wala mukerekhere mmwe, khino emiilya emosa wala piili, siiso, ni khuhikhala enamuna yo ovuluwa.

⁹ Nto miyo kaamonne-ru mutthu arowaka omuratthini mmwaatiyani mukhaani, akilanthene vale asomaka, arowaka, ni kipacerya omukhuwelela, “Mukhume mmwaatiyani mmo. Mwaatiya owo khonrowa owerya ovira mawipi awo.” Vano, kahi wira kirina etthu ya nthowa ni mulopwan'owo, hata kikhalaka oomukhuwelela ni omulavulela voolipa-vo saana. Kehiyo etthu ya nthowa ni mulopwan'owo. Miyo kinnimpenta mulopwan'owo, masi koosuwela wira onoorowa omora. Mwaha wa yeeyo kinimukhuwelelaaka. Okhala wira owo kahiyo...

Okhala wira miyo kinnimpenta, mwaha—mwaha wa yeeyo kinikhuwelaaka. Vaakhanle wira nkaacaliwa, miyo kaamwiira, “Ahe, mweettihe saana,” muroweke, moone, vaakhanle wira nkaacaliwa n’uwo.

¹⁰ Masi mwaha kinihimeryaaka itthu iyo okhala wira miyo kinnithokorerya Ekereja. Miyo—miyo kinnithokorerya Ekereja ya Muluku. Ni miyo—miyo okinanara woona Eyo paahi ephiyeryaka muupuwelo wa mutthenkeso. Ni kinnisuwela ettharelo eyo, wira mwaha wa yeeyo khula ekereja ekenlyaaya mmiyalani, siiso ene, volulukama ettharelo yeeyo ya mutthenkeso.

¹¹ Muupuwele paahi muhakalaliho okathi w’aLuteraano, nkawehani vatthu omalenlyaaya. Ni omalakaruru ophiyerya yeeyo, khonkhalakhala ovenyaka-tho. aLuteraano khanatoko otthika. Nkaaweheni aMetotista a Wesley, khanatoko otthika. Nkaaweheni aNawetta a Osantu, aNasareno, othene akina aya, aPatista, maPrespiteriyano. Awo anookhalana muhakalaliho, vano nto mutthu mmosa onovenya ni owerya wa Muluku mwa yoowo, onoopacerya mweettiho mmosa mwa Erooho. Vano mutthu uwo omalakaruru orowa, vano awo ampaka mutthenkeso wa yeeyo.

¹² Ntoko Mwaalaano wa Bibilia Moody, nipuro nooreera, masi khonkhalakhala okhalaka ntoko Moody saarinaawe. Munnona? Ni itthu Moody eemereryaawe, awo ari ikilomo imilyawu sene voorakamela yeeyo, tivo eyo vo. Nto vano yothene eyo ti y’akhili, nave Moody aarina mwa Erooho, moone. Nto vano nyuwo—nyuwo munoosuwela yeeyo, mwa itthu seiyo.

¹³ Vano, kimalakaruru opacerya, khurwa oPhoenix nno, miyaakha sivinre, mweettiho wa Pentekosite, kaahikhalana mureerelo wo opaceriha mutthenkeso mmansaka. Axinna a Epula Yookiserya yaahikirweela, khwira, “Ti yeela. Nrowe nipacerye. Vano, hiyo ninrowa okhala—okhala aalupale waavikana othene ale akina.”

¹⁴ Miyo khwira, “Ikharari! Kahi yeeyo. Eyo kehiyo—eyo kehiyo ti etthu ene, axinna. Nyuwo mwa—nyuwo mookhuma ikilomo imilyawu sene m—mphironi. Muluku khonrowa oreeraha.” Mmusome wahala anyu. Mmusome Bibilia. Khonkhalakhala okhalaka mutthenkeso mukina, onrowa okhuma mwa yeela. Ti yeeyo. Ela enimwiitthokiha ekele mu. . . Eri mmukhaleloni wa Lawotiseya vano. Masi miyo kinimooleelani, munna, khasinrowa okhumelela-tho mitthenkeso sooreerihwa ni Muluku. Khenrowa okhala etthu ya yeela. Hiyo niri W’orwaani w’Apwiya. Munnona? Ni Muluku onrowa waakuxa ale yaahanle a mweettiho ola muulupale wa elapo yothene, oniiraneya vano, ntoko Mwaakameliwa, masi khenrowa okhala etthu enrowa otthokiha, mwa erooho, emaara ekina. Munnona? Yoomala.

15 Kaawoonaka axinn'aka, axinn'aka oophenteya, yuuramelaka epantte yeeyo, nto miyo kinoohimya eyo ni sothene sirinaaka. Nto imaara sikina axinna aniira, "Ahe, Munna Branham ohaana nthowa ni hiyo. Hiyo nri. . ." Eyo ti yoovonyeya. Wulu! Eyo—eyo t'itthu yoorakamelaxa muupuwelo aka, wira onkhala okhalana nthowa ni mutthu. Miyo ka—miyo koocaliwa ni nyuwo. Miyo ka munn'inyu, moone, ni kiniilipiha wira yooreeraxa enweryaaka. Nto mwaha wa yeeyo kihinatoko aka wiitakanxa ni hata mutthenkeso, wira kiwerye weemela v'ephakani kiire, "Munna, nnari. Kahi siiso."

16 Awo aniira, "Hiyo niniira mpantta wa Asempeleya." Eyo ti yooreera. Asempeleya a Muluku anikhala eparakha yuulupale wa miyo. "Hiyo na a Ikhomo xexe." Ahe, nkawehani eparakha xeeni awo ankhalakaaya wa miyo. "Hiyo na Nsina na Yesu." Nkawehani eparakha xeeni awo ankhalakaaya wa miyo. "Hiyo n'ale, ale." Khula enamuna, othene aya iparakha. Awo a—awo atthu a Muluku. Munnona? Ni atthu a Muluku ari mwa yothene eyo.

17 Nto naapaceryaka wiiraana, niiraka, "Hiyo nri vooreera vakhani wa ovikana Ekereja ya Muluku," moone, wala, "Hiyo niri vooreera vakhani ovikana ele ya Ikhomo xexe wala Nsina na Yesu," wala etthu siiso. Okathi nryaahu paahi. . . Hiyo pooti ohiiraana vakhani mwa akhili. Hiyo othene noorowa olya y'ohiyu olelo, hiyo othene nikhuurale etorta yoovirikana, masi hiyo ninkhuura etorta enamuna emosaru, moone. Owo ti muupuwelo. Vano muupuwelo aya, ti, vakhala—naweryaru woona opatthana wahu. Tivo muhuurameleke mutthenkeso. Muuramele oKalvario. Nyuwo munikhala ookhwa wa itthu iya sikina. Munnona? Ni kinnaamini. . .

18 Kihiyeni kihimye ela eryeene mmuruni mwaka. Miyo kinnaamini wira mutthenkeso woovara muteko wooreera. Tthiri, imaara sinci-ene, axinna, ninaamwi oninanaraka wuupuwela, sinnikhumelelaka itthu eriyari ahu, n'itthu siiso, sinkhalaka okawayeya. Nto atthu anookuxa ikawayeyo iyo ni waamwarya atthu khula epantte. Nto nikhuru n'axinna nnoothukumana nikhanle. . . wira miyo. . . Entthunaaka ohimya wira anookhuma ntoko awo siiralyaaya mahiku oopacerya ni inamuna sothene sa itthu. Ni—ni nlelo nookhalana eyo olelo, moone, nlelo yeetaka. Ni atthu anwerya wiiraana. . .

19 Elatarato y'ekeekhai ya Pentekosite, mwa wuupuwela waka, waasiwaka mutthenkeso, ti e—ekereja, Munna Pethrus, ekereja y'oFilatelfia oSuweesiya. Vano, awo khancaliwa ni enamuna xeeni ya mwixuttiho murinaanyu, vakhalaru wira ti Yoolempwa. Mwatthuna vale woona enamuna *ela*, enamuna *ele*, wala etthu p'itthu, vakhalaru wira mookhalana opatthana ni munikhala makhalelo ooloka vekeekhai ni oowaarya. Eyo eri vo. Eyo ti yooreera. Ni mwatthuna ohimya wira Yesu onrwa vakhavaloni yootteela, nto mukina ohimya wira Owo onrwa

munekuni noottelea, munwehereryeke Owo siiso. Mukeleleke ohoolo, vakhala-ru wira munthara makhalelo ooreera ooloka ni opatthana. Ti siiso eniiriwaaya. Ti yeeyo.

²⁰ Eyo, ahe, vano, mwaha wa yeeyo, apatthani, miyo kikhanlyaaka nnikhuru nla na Alipa a Nakoso. Okhala wira, koosuwela wira sookhala itthu sinci-ene mmwe sirina wookololiwa. Masi ti—ti yooreeraxa hiyo nrinaahu. Ayo. Ti yeeyo. Ayo. Sookhala itthu sinci-ene kirinaaka ohimya. Ni—ni nyuwo, axinna va animooleelani, miyo nkinatoko ottikiha moolumo n’awo. Miyo kiri va ntoko murumeyi a Muluku, wira kihimye Ekeekhai. Ni kihaana waakhula mwaha wa yeeyo. Ti yeeyo. Munna Rose irrale, “Mwaha wa yeeyo ninsiveliwaahu ni nyuwo.” Ahe, eyo—eyo, ahe, hiyo khanikhanle. . . Hiyo—hiyo nihaana okhala ni Masu ala. Munnona?

²¹ Okathi vakhani ovinre, kinoona wira, mwaari o. . . Miyo kaari ilapo s’okhopela, okisironi mwaisana, ni awo yaahikhalana muthukumano, nto amosa-amosa w’axinna yaamwiittotopa mwaha wa muthukuman’ola muulupale weiwo awo yaarinaaya alipa a nakoso, a elapo yothene. Nto awo yaalavula mwaha wa, “Miyo kaarina nipuro naamukhaani vanloothoni. Nakoso aka khaari ooreera. Ni kaanikattiyamiheya vanci-ene. Nto naanaanoru, miyo—miyo kimwaakhela Kristu, nto—nto, oh, kookhalana sothene vano.” Vano, eyo ti yooreera. Hiyo ninnixukhurela yeeyo. Eyo ti yooreera, masi muhakhu kweekwe khenihimya Kristu. Yeeyo, moone, ni nihaana oweha saana yeeyo. Vano, eyo ti yooreera. Munnona? Miyo. . . Hat’etthu ya nthowa ni yeeyo.

²² Masi mwa enamuna khata kaahaapwapwela axinna ohiyu ule. Hiyo naahirowa mpakha omoteeli weiwo ni—nikhuru nimosa na hiyo naamanke-ahu, ni Munna Shakarian ni hiyo othene. Nto miyo khwira, “Ahe,” miyo khwira, “axinna, kinrowa wooleelani.” Miyo khwira, “Miyo—miyo kinoona wira nyuwo axinna mwa nikhuru nooreeraxa kitonko aka osuwela, kookhalaru. Masi,” miyo khwira, “etthu ene t’ila,” miyo khwira. . .

²³ Miyo nkiniira mpantte wa hata mutthenkeso, masi kiniira mpantte wa opatthana iwo ni yeeyo. Miyo kinkuxa ettikitti ya opatthana ni yaawo, ettikitti emosa paahi enkuxaaka, okhala wira eyo enthoonyerya mitthenkeso sothene, moone. Nto ti yeeyo enikisivela. Ti yeeyo kiniilipiheryaaka.

²⁴ “Masi,” miyo khwira, “etthu enikixankiha, okhala wira nyuwo axinna ohoolo wa axilopwana ale iwe, akhanle ooraala imaara ekonto woovikanani nyuwo, vano nto mphavelaka waaleela wira Kristu ti okhalana muhakhu. Muheereryeke waatumiherya yeeyo.” Munnona?

²⁵ Muheereryeke wiilikanyiha n’ulumwenku. Olumwenku orweeke vapuwani vahu. Muhiroweke nyuwo vapuwani

vaya. Munnona? Munnona? Mwarowaru vapuwani vaya, khaninrowa waarya ni yaawo. Tthiri, Ehapari yooreera khenaarya; enookokola. Hollywood onimwaarya. Ehapari yooreera enookokola. Wookhala ovirikana wunci-ene okokola ni waarya.

²⁶ Nto siiso, vano, nto miyo khwira, “Axinna a Pentekosite oopacerya yaarina etthu, khuphavela wiihuluxa, ni yaalyihaka alipa-oohaawa, ni sikina siiso, ni khukhuma ehikhalanne etthu, moone, wira elaleerye Ehapari yooreera, ekhalane opatthana.” Miyo khwira, “Vano hiyo nimphavela wiihimya sa kavi nrinaahu.” Miyo khwira, “Evirikanelo xeeni!”

²⁷ Nto munna mmosa oophenteya, nuuvira okathi vakhani khuyenya, khukii-rela, khwira, “Munna Branham, eyo yaari emosa wa soovonya suulupalexa atthu atonko aya wira.”

²⁸ Nto miyo khwira, “Vano, nkawehani, munna, miyo nkaaphavela waathoonerya atthu wira atumihe sirinaaya. Masi kimphavela paahi owooniherya etthu alipa a nakoso ala.”

Owo khwira, “Iwo waari ovonya wuulupale, atthu.”

²⁹ Miyo khwira, “Awo yiirale eyo ni Erooho Yoowaarya. Erooho Yoowaarya erimwaaleela wira yiire yeeyo.” Erooho Yoowaarya yamwiirela mutthu wira aire etthu, mwiire ele Eyo ehimmyaya wira mwiire.

³⁰ Nto owo khwira, “Ahe, iwo waari ovonya wootepaxa ekereja etonko aya wira.”

³¹ Miyo khwira, “Mwaha wa xeeni, munna?” Nto vaavale vale ohoolo wa mulopwan’owo kaalavulaaka-no.

³² Owo khwira, “Okhala wira, vamanlyaya okhumelela onyakulihana vakhani mukereja mmwe, waahikhala ovirikana aKresia ni e—ni aHeperi, ni siiso,” khwira, “atthu ale khayaarina nipuro n’orowa. Awo khayaarina hata empa wira atthikele-wo.”

Miyo khwira, “Vekeekhai otthuna wa Muluku.”

Owo khwira, “Vaaweryaneya sayi okhala otthuna wa Muluku?”

³³ Miyo khwira, “Awo yaaroorowa mapuro othene, emwaryaka Ehapari yooreera, okhala wira khayaarinasa hata nipuro n’orowa.”

³⁴ Erooho Yoowaarya khenivonya. Eyo khenivonya. Ti yeeyo tu. Ni ntoko waalavulaaka nsana ohiyu, muhaana wiivaha wa Muluku, ni wiivaha wa Masu Awe, n’uvarelela Yaawo. Hata wira anoorohani yayi, mukhale muttharaka Yaawo paahi. Mutthikele siiso.

³⁵ Masi vekeekhai miyo ka—ka namakhaliherya a opatthana nno wa Alipa a Nakoso. Ni khula muthukumano kinlattuliwaaka-wo, kweekwe kinnirowa ni olavula, ohimya ithu sothene sinweryaaka. Nkineererya opaka etthu paahi

ni wira kihimye, wira emusivele mutthu, *Lexe ni lexe*. Masi khula okathi onrowaaka vamuthukumanoni vaka, kinniphavela osoma ni ovekela ni otthuka, ni wira, “Pwiya Yesu, exeeni—exeeni kaakhanlyaaka ohimyaka yaarowa waakhaliherya atthu ale.”

³⁶ Atthu othene annisuwela wira nkihiyo mulaleyi. Miyo nkihiyo namalavula. Miyo—miyo ka... Khula mutthu onnisuwela eyo. Miyo nkihiyo mulaleyi. Mu—mutthaka aka waavekelela aretta, ni sikina siiso. Masi, miyo nkihiyo ka mulaleyi. Khula mutthu onikiwiwa olaleya, aamusuwela eyo. Masi enihimyaaka, kimpavela olipiherya wira ekumiherye etthu.

³⁷ Wira ehiiriweke, “Owo kahi—mulipa-oolavula a ikuru? Owo khonrumeela elavulelo awe voolikana? Owo kahi oophwanelaxa vapulpitu?” Miyo nkinthuna eyo. Miyo—miyo nkaakhanle wira. Muluku khokiitthanenle yeeyo.

³⁸ Masi kimpavela ophwanya etthu enrowa omukhaliherya mutthu uwo, ni ekereja eyo wira ekhale ekereja yooreerela, waakhaliherya wira ekhale atthu oolokaxa, avekelelaka yeeyo.

³⁹ Vano, kaalavula siisa okhala wira kaahoona wira atthu akina nlelo yaamoora, ni erupaka epula. Mwaha wa yeeyo kaahimyaaka itthu iya. Vano, soovira minuutu muloko ni mithanu.

⁴⁰ Nto vano kinthuna kimuxukhuru munna. Kinnimusuwela Munna Fuller okhuma khalayi, kweekwe kinnimpenta, muhina mmurimani mwaka. Ni hiyo nookhalana itthu sinci-ene soowuulaana, Munna Fuller. Ni siiso hiyo... kinnimusuwela Munna Fuller vano mwa miyaakha sinci-ene, ni koosuwela wira owo mutthu eekeekhai ni ooloka a Muluku, ni miyo kinnimpenta. Nto miyo kiri va voosiis’ula wira kikhallane opatthana. Kinnoona othunku ohaleela ohiyu awe okathi waahimmwe-aya vanipuroni va, masi yaari etthu kahaawenryaaka osyaka. Ni kinnitteeliwa murima okhala va voosiis’ula, woona ekerej’awe, yooreera, moota Muluku onaakelelihaawe ohoolo ni waareeriha. Ni—ni itthu sothene Owo omwiirenly’awe, miyo vekeekhai kinnixukhurela yeeyo. Muluku atthikele amureerihaka, ni areerihe etapernakulu ila, ni—ni e—nikhuru na maatinistratoore, matiyaakono, ni mamempuru othene a ekereja. Ni wira munnuwe ni mukelele ohoolo mwa mahala a Apwiya, ti mavekelo aka voowiiyeviha.

⁴¹ Vano, nihinatthi waattamela Masu, nrowe nimwaattamele Mwaneene, toko. Nrowe nuurame muru okathi vakhani paahi wira nivekele.

⁴² Niphwanyaneyaka voottittimiha vano Ohoolo wa Muluku, ni muru ahu ni murima soowuurama, yookhala yoovekela mmurimani mwanyu, etthu muntthunaanyu, mwaatthunaanyu wira Apwiya yoovaheni, wira kiwuupuweleni mmavekeloni

mwaka voosiis'ula va okereja? Mwaamutthuna osuweliwa nvenxaka ntata? Mukhalihe mmuupuweloni mwanyu paahi, khula ekhanle. Apwiya yoovaheni khula mmosa a nyuwo yoovekela anyu.

⁴³ Muluku Tithi ooreera murima ni oowaarya, Ole opattunxe itthu sothene mwa Kristu Yesu, wa ovuwa Wawe, ninoorwa Ohoolo Wanyu voosiis'ula ni oxukhuru mmurimani mwahu. Ni ntoko seettihalyaahu vapulani, ni ettheke erumaka, epula erupaka, hiyo ninnivekela, Tithi a Wirimu, wira Nyuwo munimwaraxele epula ya Wirimu, epula ya erooho, epula yookiserya ni epula yoopacerya, vamosa, mmurimani mwahu olelo.

⁴⁴ Hiyo ninvekela, Tithi, wira Nyuwo mureerihe ekerej'ela. Hiyo ninnixukhuru vanci-ene mwaha wa yeeyo, mwaha wa pastore aya, mwaha wa muthukumano aya, mwaha wa . . . nipuro atthu anweryaaya okumana ni nipatho vamuru vaya ni ekhukulu yooreera ni yoomaaleleya wira ekilaathi-vo.

⁴⁵ Hiyo nintthikela mmuupuweloni mwahu mwa wahala a Ekereja ela yoopacerya, Ekereja katolika ela, y'arummwa, yoopacerya, ni woona moota yaakilaathiki aya mmyalani wala etthu p'itthu yaaweryaaya, wira yiiwe Masu a Muluku, ni yaanikokhora vathi, ni oriirya ni mwala ni etthaya, ni vaavo yaanookolela matata aya Wirimu ni opuha Mukhalelo wa Erooho Yoowaarya. Yaanaavaha etthunelo yeeyo mmakhaleloni mwaya mpakha yaakelaaya mulittini mwa amwatto, nnakhala ehithukumelaka, masi otheya wiitho waya, ewehaka Wirimu, asuwelaka wira, muhina mwa minuutu vakhani, yaarowa okhala Ohoolo Wawe Ole awo yaamphentaaya.

⁴⁶ Oh, waamini wa axitiithi ahu, nlelo okumi, waakhanleru mukhatteya, mooro ni xoowa. Muuluule mwa hiyo, O Pwiya, waamini weiwo. Munivahe eparakha yuulupale ya arummwa ya Erooho Yoowaarya.

⁴⁷ Khula mmosa olelo aavenxale matata, Nyuwo moosuwela etthu anthhunaaya, Pwiya. Nyuwo moosuwela etthu yaari ottuli wa ntata nle, niwoko xeeni ni etthunelo mmurimani mmwe. Nyuwo paahi ti munwerya ovaha khula etthu yoothuna, Pwiya. Ni kinnaavekelela, kihisuwelaka yoothuna aya, masi kivaheryaka nivekelo naka ntoko exonttelo wa awo. Ntoko murumeyi Anyu, miyo kininvekelela vaxariya-vo khula mmosa, wira, yaakhele, khula etthu awo avekenlyaaya. Mwaareerihe, Tithi.

⁴⁸ Nto vano naasomaka Masu Anyu, ni wiixuttiha nisomi nla na Ttiminku, p'uhimya wene, voosiis'ula, Miyo kinvekela wira Nyuwo mukuxe Masu ala ni mukumihe khula ohaamini mwa Yaawo, Pwiya; wira, khula ekuru ya Xetwani eneererya wiikhaliha, yaarowa okhottiherya Awo wunnuwa, Awo akele mwa khula murima, ni ekhale miri sa mihokorokho

sa exariya, Pwiya. Waamini, okumiheryaka yeeyo Nyuwo mulamulenlyaanyu wira Masu Anyu yiire, mwiraka, “Awo khandthikela wa Miyo siyo-ene, masi anoovara ele avaheriwaaya.”

⁴⁹ Vano, Pwiya, mmureerihe murumeyi Anyu. Masu Anyu aareerihwa. Ni, hoothe, niwerye olyiha nikoto Eroho Yoowaarya enivahalyaaya vo—vookhapelela. Hiyo ninvekela mwa Nsina na Yesu. Amen.

⁵⁰ Vano, wa nyuwo onoosivelani osoma imaara sikina, ni mu—Mutthaka, miyo. . . Miyo kinoovekelani, wira mukhunle Muliivuruni. Ni kirina paahi Mutthaka mmosa mwaamukhaani wa exikola ya Ttiminku, ntoko, w’atthu voosiis’ula.

⁵¹ Munniwerya okiiwa oratteene, mapuro othene, nipuro nothene? Kiroovenxa mikorofooni iya. Wookilala vammilo vakhani. Miyo, vamanlyaaka ophiya nno, okiphwannye kamasi. Xetwani ohiira saaweryaawe wira okikhalihe ottaiwene wa wenno. Miyo nkisuwenle. Kookupali wira Muluku vekeekhai onoomwaraxela etthu yuulupale muthukuman’ola okathi ula, okhala wira Satana ohiira sothene aaweryaawe wira okikhalihe ottaiwene wa yeeyo.

⁵² Masi vano ninrowa osoma mwa Maphattuwelo, kapiitulu 22. Ni nyuwo munrowa omukhunla Bibilia anyu, nrowe nisome nipuro nimosa na Yoowo, vamosa. Maphattuwelo 22, nrowe nipacerye versiikulu 9.

Vano awo yaahiphiya nipuro Muluku aamuhimenryaawe; nto Abrahamu aahimuteka altaari vale, khuhela ikhuni oratteene, aahimutthukwa mwan’awe Isakhi, khumwaatalela vasulu valtaari vasulu va ikhuni.

Nto Abrahamu aahookola ntata nawe, khukuxa mwaalo wira amuhite mwan’awe.

Vano nlaikha n’APWIYA nahimwiihana okhuma wirimu, niiraka, Abrahamu, Abrahamu: vano owo khwira, Miyo kiri va.

Vano nlo khwira, Muhimpweherye ntata nanyu mwanamwane, hata muhimwiirihe etthu: nto vano miyo koosuwela wira munnimoova Muluku, woonaka wira khamukikhoottiherye mwan’inyu, mwan’inyu mmose-ene.

Abrahamu aahivenxa maitho, khuweha, khoona epwittipwitthi ottuli wave ephanre manyaka aya vamwiwani, wala manyaka aya, kiireke: vano Abrahamu aahirowa khukuxa epwittipwitthi, khuvaha yeeyo vasulu. . . khupaha mukuttho nipuro na mwan’awe.

Nto Abrahamu aahiihana nsina na nipuro nlo Apwiyā anoonivaha: vaavo vanihimmwaya mpakha olelo, Vamwaako APWIYA anoovaherya.

Vano nlaikha n'APWIYA nahimwiihana Abrahamu okhuma wirimu emaara ya neenli,

Nto khwira, Miyo koolapha mwa nsina naka anihimya t'APWIYA, . . . okhala wira muhiira etthu yeela, nave khamukikhoottihenrye mwan'inyyu, mwan'inyyu mmosene:

Wira mooreerihani Miyo kinimooreerihani, ni kaacereryaka kinimwaacererya osuulu anyu ntoko ittheneri sa . . . wirimu, ni ntoko mihaava . . . ophareya; nto osuulu anyu onookuxa mukhora wa nwanani aya;

53 Kintthuna kikuxe nuulumo nlo nookiserya wa yoosoma: *Nto Osuulu Anyu Onookuxa Mukhora Wa Nwanani Aya.* Owo ti—natiri ooreeraxa.

54 Vano, hiyo othene noomulimalela wahala ola, khino noomusoma imaara sinci-ene, okathi p'ukathi, a Abrahamu, ni moota Muluku aamwiihann'awe owo elapo awe, ni moota owo aaryaawe mutthu pure paahi, nnakhala etthu yoosuwanyeya. Masi Muluku khumwiihana ni khunvaha natiri.

55 Vano, kintthuna wira nwehe wira natiri ula Muluku aammanenlyawe Abrahamu khaari paahi a Abrahamu, masi aari a osuulu awe nuumala owo. Vano, atthu anci-ene aniira, “Oh, vaakhanle wira kaahikhala ntoko Abrahamu, vaakhanle wira kaahikhala vaavo Muluku aakhanlyaaawe olavulaka ni miyo ni—ni okivaha nrromelo ntoko Owo saamwiirenlyaaawe Abrahamu, nto kaamukhalana, miyo—miyo vekeekhai kaamukhalana waamini, Munna Branham, vaakhanle wira kaahikhala, vaakhanle wira Muluku aahilavula ni miyo ntoko Owo saalavunlyaaawe ni Abrahamu.” Masi nyuwo murina natiri mmosaru Abrahamu aarinaawe, eyo ti wii, nyuwo mwakhala Osuulu w'Abrahamu.

56 Vano nyuwo muniira, “Masi, Munna Branham, miyo ka Mmalapo. Nkaakhanle okhalanaka epyo y'Abrahamu.”

57 Osuulu w'Abrahamu khuwaari osuulu w'ephattu. Waari Osuulu wa erooho, maana olyihiwa masoma wa yeeyo khuwaari hat'etthu. Natiri, Owo hata aanvahale ohinatthi olyihiwa masoma. Masi owo aavahiwe ohinatthi olyihiwa masoma, nave khuwaari mwaha wo wira owo aahilyihiwa masoma ni aari mwa waataana ni Muluku siiso. Okhala wira Abrahamu aahimwaamini Muluku.

58 Ni Yolempwa ehimnye wira, “Okathi hiyo onikhwaahu mwa Kristu, hiyo ninkhala Osuulu w'Abrahamu.” Paulo onihimya yeeyo, “Nto ole okhanle muYuta khahiyo muYuta ota, masi muYuta muhina.” Tivo, vakhala wira mooyariwa ni

Erooho ya Muluku, “nyuwo mwa Osuulu w’Abrahamu, ni alipa-oorithi vamosa ni Abrahamu voolikana ni natiri.” Munnona? Tivo khula natiri Muluku aanvahalyaawe Abrahamu ti awinyu, okhala wira mwa erooho nyuwo mwa Osuulu w’Abrahamu.

⁵⁹ Ni nyuwo mwa muYuta saana ovikana saarowaanyu okhala mwaayariwe-ru ni ephome ya muYuta, ni nto—ni nto mwaari muYuta ortotookisa mukereja mmo, ni namakhoota a Erooho Yoowaarya ela yooreeraxa ni Pwiya Yesu Kristu. Munnona? Nyuwo mwa muYuta saana, okhala wira mwa muYuta oyariwe ni natiri a Wirimu, yoowo Muluku aanvanhe awe Abrahamu, nto Abrahamu khumukupali ni waamini, nto ti yeeyo yaamukhalinhe ele owo aaryaawe. Tthiri, muYuta ovalaaniha paahi, ni mutthu olapunwe, muHeperi, ni siiso.

⁶⁰ Vano, masi okathi muniivalanihaanyu ni itthu sa molumwenkuni, mootupha mukaano ole woovalaaniha, ni muneetta muttethe w’emalapo, ni muttethe woovirikana n’ule mwaaryaanyu, wopaceryani, n’atthu muhinatoko anyu opatthana ni yaawo wopaceryani, vano munkhala muYuta a muroohoni. Okhala wira, enamuna emosaru Abrahamu, mwaha wo waamini, aakhumme awe elapo awe, khwaahiya atthu awe, khurowa muttethe w’emalapo n’atthu amalapo, nyuwo muhaahiya atthu anyu, moohiya olumwenku ottuli, muhaahiya axirikha anyu ottuli, moolapuwa, ni Ephome ya Kristu, vano mwa anawetta, mphavelaka Muttethe, yoowo Namateka ni Namapaka okhanle Muluku, ntoko Abrahamu saaryaawe. Anawetta, vamosa ni Yoowo, mukhalaka muheemani, ikereja, anammuttettheni a Omwene wa Wirimu, alipa-oorithi itthu sothene mwa Yesu Kristu. Munnona? Hiyo noolapuwa, nihiivalaaniha.

⁶¹ Vano, Abrahamu, natiri omaneliwe Abrahamu ni Osuulu awe nuumala owo. Vano, Muluku aahinvaha natiri ula Abrahamu, wira Osuulu awe, waamurowa okuxa mukhora wa nwanani aya vaamanlyaawe Owo omwehererya Abrahamu, omwehererya Abrahamu. Vano, nuumala weehereriwa orwa, nto . . .

⁶² Abrahamu aahirukunxa murima, hiyo naamuhimya siiso, okhuma epakawu okela mwa Muluku. Vano nto Muluku aahinvaha, ntoko ethoonyeryo ya Erooho Yoowaarya, olyihiwa masoma. Vano, numala olyihiwa masoma, nto khurwa okathi wo weehereriwa.

⁶³ Ethoonyeryo yooreera saana va ya Ekereja, wira, vammalaahu woopowa, nto ninvahiwa ekanyeryo ya mulipa-oolyihiwa masoma, yeeyo ehikhanle ya erutthu, masi ya Erooho. Nto Erooho Yoowaarya ti olyihiwa wahu masoma. Owo mwaalo woowiitha wa Muluku. Enoovalaaniha ni othikila ehala-hala ya erutthu, ya molumwenkuni, mwa hiyo. Masu a Muluku, t’owiithaxa onvikana xoowa oniitha nno ni nno! Tivo, moone, enoonthika-tho, Masu a Muluku t’itthu Erooho Yoowaarya

enrumeelaaya; kahi iyaaminelo, kahi miromolelo. Masi Masu t'anninivalaaniha ni itthu sa molumwenkuni. Eyo enoothikila akhili ahu ni itthu, ni enoonivahererya voomalela wa Muluku.

⁶⁴ Yesu ohimye wira, “Nyuwo mwakhala mwa Miyo, nave Masu Aka mwa nyuwo.” Eyo vo. Vano, awo kahiyo masu anyu. Awo Masu Awe. Vano, moone, “Nyuwo mwakhala mwa Miyo, ni Masu Aka mwa nyuwo, munoowerya ovekela sintthunaanyu.” Uh-huh. Munnona? Ele ekhanle, nyuwo khamunlavula nuulumo nanyu yeenyu. Nyuwo munlavula Masu Awe.

⁶⁵ Tivo nto Erooho Yoowaarya t'Ile enkuxa Masu a Muluku ni onivalaaniha ni itthu iya sa molumwenkuni, moone, olyihiwa masoma, ethikilaka. Vano munoovira okathi wo wehereriwa.

⁶⁶ Vano, Abrahamu, vamanlyaawe wiitthaniwa wira okhume, muttethe w'oKhalteya, muttethe w'oHuri, owo aahikhala nawetta, mmalapo. Vano nto Muluku aahimwiitthana, owo vaamanlyaaya wooniheriwa wira aamurowa otthikela ni olipana Muluku mwa Masu Awe. Vano, etthu Muluku iiraly'awe nto, waari onvaha ethoonyeryo, wira Owo aahimukupali, vano khimulyiha masoma. Vano owo aahimulyiha masoma Iximayele ni ethhoko awe yothene.

⁶⁷ Nto vano moone, okathi—okathi oniitthaneliwaanyu okhuma, yopacerya munvira mowehereriwani, wira mooniwe sinto munookelela ohoolo. Vano nto Muluku onimoovahani Erooho Yoowaarya, yeeyo ekhanle ethoonyeryo wira Owo ookupali waamini wanyu munihimyaanyu okhalana mwa Yoowo. Munnikitthara vano? Owo onoorawa okupali.

⁶⁸ Vano, miyo kaalavula ni. . . Khino aakhala axinna amosa-amosa aPatista oophenteya akilaanthi va. Ni atthu othene annisuwela wira miyo kikhumme okereja Patista. Miyo kaalavula ni munn'aka muPatista. Nto owo khukiirela, “Munna Branham?” Owo aari Totori a oMuluku, mutthu ooreera murima, muKristu eekeekhai. Owo khwira, “Masi, Munna Branham, munikumiha vayi wira opatiiso wa Erooho Yoowaarya ti woovirikana ni omwaamini Kristu Yesu?”

Miyo khwira, “Ti woovirikana, munn'aka oophenteya.”

⁶⁹ Owo khwira, “Khamunuupuwela wira okathi munimwaakhelaanyu Kristu, munaakhela Erooho Yoowaarya?”

⁷⁰ Miyo khwira, “Voolikana. Masi,” Miyo khwira, “moone, nyuwo munihimya paahi wira moomwaakhela Kristu, mpakha Owo okupali.”

⁷¹ Owo khwira, “Munna Branham, Abrahamu aahimwaamini Muluku, vano khukhalihwiwa naxariya.”

⁷² Miyo khwira, “Ayo. Masi Muluku aahinvaha ethoonyeryo, wira Owo aahaakhela waamini wawe, okathi Owo onvahalyaawe ekanyeryo ya olyihiwa masoma, wira Owo aahikupali waamini wawe.” Amen.

⁷³ Vano, okathi onimwaakhelaahu Kristu ntoko Moopoli ahu, nto, nakhala naxariya mwa yeeyo, vano Muluku onnivaha ethoonyeryo, wira Owo ohaakhela omwaamini wahu Kristu, mwaha wo onivaha ekanyeryo ya olyihiwa masoma, yeeyo ekhanle Erooho Yoowaarya. Eyo ekanyeryo ya olyihiwa masoma. “Muhiriipihe murima Erooho Yoowaarya ya Muluku yeeyo mutthittiwaanyu ekanyeryo mpakha Nihiku no Woopoliwa wanyu.” Kahi mpakha muthukumano onrwa; masi mpakha Nihiku no Woopoliwa wanyu. Ti yeeyo, aEfeso 4:30. Vano, ti siiso hiyo ninaakhelaahu Erooho Yoowaarya.

⁷⁴ Vano, nyuwo mwaira wira, “Oh, miyo ka mulipa-oowaamini,” nto Muluku khonatoko woovahani Erooho Yoowaarya nlelo, Owo khonakupaliki iyo. Nyuwo munihimya wira munnaamini paahi. Masi okathi ohoverya wothene... Nkinihimya wira khamuhiyo mulipa-oowaamini vano. Mwa epante emosa, nyuwo mwa mulipa-oowaamini.

⁷⁵ Masi okathi Muluku ophwannye-awe ocaliwa, nyuwo mphwannye anyu ocaliwa wa Yoowo, kiireke, ni Owo onnikupali wira mwa mwan’Awe, ni Owo onnisuwela murima anyu, ni Owo onnoona exariya anyu, Owo onnisuwela wira itthu sothene soothikiliwa mwa nyuwo. Vano Owo onimootthittani ekanyeryo Momweneni mwa Muluku, ni Erooho Yoowaarya, oniheryaka olumwenku wira Owo ookupali waamini onihimyaanyu wira mookhalana mwa Yoowo. Munniiwa saana vano?

⁷⁶ Vano, nuumala naanaanoru, onrwa weereriwa. “Khula mwaana onrwa wa Muluku ohaana toko ottharuxiwa, wehereriwa.”

⁷⁷ Yesu, omalaka-ru waakhela omalela wa Erooho, omuro, okathi Yohani ompatinse awe, naanaanoru xetwani aahimukuxa Owo amurowanaka mothakoni, wira avire okathi wo ottehattehiwa. Masi okathi Owo okunxaawe Masu a Muluku khimuxintta xetwani, “Yoolempwa. Yoolempwa,” Owo aahitthika nto oolikana wira avare muteko Awe.

⁷⁸ Nto ti siiso Muluku aamwiirihalyaawe Abrahamu. Vano, Muluku, vamwiitthanne awe okhuma muttethe awe, ni owo wiivalaaniha muttethe awe, atthu awe, vano nto Muluku khunvaha ekanyeryo ya olyihiwa masoma, nuumala aahinvaha mwaana. Vano owo khurowa mpakha wehereriwa iwe wookiserya, mpakha okathi waarinaawe onvaha mwan’awe Isakhi wira okhale mukuttho. Nto Owo khwira, “Woonaka wira nyuwo khammwiinanenle mwan’inyu mmose-ene, koosuwela wira munnikiphenta.” Owo aahinvaha wehereriwa iwo.

⁷⁹ Vano nuumala naanaanoru, ekhotto yaahixinttiwa nto, Owo khwira, “Nto Osuulu anyu onookuxa mukhora wa nwanani aya.” Amen. Okisivela eyo. “Onookuxa mukhora wa nwanani aya.” Ninoophiyerya nipuro nlo nookiserya mwa okathi vakhani paahi, Apwiya yatthuna vale. Vano Owo aahiphwanya

ela, Abrahamu oororomeleya. Owo vaamanlyawe omphwanya Abrahamu oororomeleya, vano Owo aahinvaha natiri ookuxa mukhora wa nwanani.

⁸⁰ Vano vaavo, imaara sinci-ene, ti nipuro anci-ene a hiyo aPentekosite ninvonyaahu, ni wuupuwela, “Ahe, Erooho Yoowaarya koomwaraxeliwa miyo. Avuwihwe Muluku! Ti yeeyo tu erinaaka okhalana.” Nnari, mulopwana. Nyuwo munoopacerya-ru paahi. Nyuwo, kahi okathi yoowo. Iwo wehereriwa wanyu ni wootoliwa wanyu.

⁸¹ Siiso ntoko ninoonaahu mu—mu, wu wa—wa—Waataana wa Khalayi; wehereriwa, wootoliwa, nto nuumala omuhela mwaana vooপুরoni. Okhalihwiwa mwaana, omukhalihwa mwaana vooপুরoni omanle-ene okhala mwaana, oyariwe mw’emusini. Owo mwaana, vano aarowa wehereriwa ni wootoliwa, ni oleliwa ni alipa-ookhapelela, ni woona moota saarowaawe okhuma. Vano nto owo onkhalihwiwa vooপুরoni, voochaleleka olikana, n’atithi awe.

⁸² Vano ti siiso olelo. Naahikhalana iyaakha soophiyaka miloko mixexe so wehereriwa wa Pentekosite, wala soovikana, moone, yehereriwaka ekereja, yooniwaka sinto anoorowa okhala oolipa, wala nnari. Yooniwaka etthu nyuwo...Ni, moone, ti vaavo kinoonaaka-tho yeeyo. Ohiya ovarelela vamwiikimanyo ni Masu, ni okelela ohoolo, hiyo ninkhala oopakiwa nittharihelaka olumwenku, nimoroxaka so, wala nimoroxaka so, wala nittharihelaka *ela*.

⁸³ Ntoko kweekwe kilavunlyaaka voolipa-vo vanci-ene ni athhu mwa etthunelo ela ya vano olelo, athiyana ammettha maihi aya, ni—ni alopwana yiiseetihaka voohiloka ni itthu sothene, ni ewaraka ikuwo soohifayi ni itthu siiso. Kinnuulumeliwa vanci-ene mwaha wa yeeyo. Masi exeeni iyo? Ophavela woopola ekereja eyo. Ophavela waaweliha *va*, vaMasu a Muluku, voochicala ele olumwenku mukina orinaaya ohimya wa Yeeyo. Mukhale ni Masu a Muluku. Amen. Munniiwa? Munniiwa?

⁸⁴ Etthu ene ti wira, ntoko saahimyaaka nsana ohiyu, aPentekosite anipelela ettheke enoopa ni ikuru, masi awo aavonya wiiwa Nsu noomaaleleya naamukhaani. Munnona? Eyo, ti yoovonyeya wira itthu iyo. Awo animuupuwela, “Vakhalaru wira ettheke ennoopa, vaareera.”

⁸⁵ Masi eyo khiyaanvanre murima profeta. Ettheke yooruma ni ikuru khiyaamuhaanxe Eliya mukhukuni. Itari sa ikuru ni okukutteya, ni epula ya ikuru, nnakhala khisaanvanre murima, sothene. Masi naamuthananinhe naari nsu nlo noomaaleleya naamukhaani, etthu iyo yaalavula muhina. “Masu Aka ti Ekeekhai. Masu othene a mutthu akhale oowootha, nave Awaka ekeekhai.” Ti yeeyo yaamukunxe murima profeta. Munnona?

⁸⁶ Ni nlelo animwiira. Masu a Muluku kweekwe annikuxa murima muupuwelo ole wa erooho, okhala wira ti muupuwelo wa Kristu mwa nyuwo, onsuwela wira Masu awo ekeekhai.

⁸⁷ Ni nyuwo munoovira okathi wo wehereriwa. Ekereja enoovira okathi wo wehereriwa. Khula mutthu onnivira okathi wo wehereriwa ohinatthi okuxa mukhora wa nwanani. Abrahamu aahivira mwa yeeyo. Kristu aahivira mwa yeeyo. Kristu numala osareya Erooho Yoowaarya, omuro iwe Yordani, Owo aahivira okathi wo wehereriwa. Abrahamu vaamanlyawe wiitthaniwa, khuheliwa mmuttettheni mwawe mwemmo waarinaawe okhala nawetta, vano khuvaha olyihiwa masoma, ni Muluku aahikumana ni yoowo, okathi p'ukathi, nlelo owo aahaana ovira okathi wo wehereriwa. Vanoolikana ni khula osuulu w'Abrahamu, Abrahamu ni Osuulu awe.

⁸⁸ Mutthenkeso, ekereja, mwaha wa yeeyo ninoonaahu mitthenkeso sahu simorelaka okerekhere w'ephiro, okhala wira vaniphyaaya mowehereriwani. Wehereriwa xeeni? Masu a Muluku. Iwo ti wehereriwa. Masu a Muluku mwehereryo. Ninrowa wira etthu nikhuru n'atthu ninihimyaaya wira niire, wala ninrowa wira ele Muluku onihimyaawe wira niire? Eyo t'evirikanelo.

⁸⁹ Yaahiiraneya, mahiku a Dwight Moody, mahiku a Finney, Sankey, Knox, Kalvino, Spurgeon, othene aya akina, alopwana awo a erooho, mitthenkeso saahaatthara. Naahikhumelela nikhuru n'axilopwana ottuli wu naatthukunle ephiro ya yeeyo, khula mmosa aaminiki *ela* ni *ele*, ni aacereryaka vakhani *va*, ni okumihaka vakhani *vale*, ni waacererya vakhani *va*, mpakha vookiserya awo okhaliha mitthenkeso yeeyo.

⁹⁰ Nto yaairaka, mulipa-oowaamini ekeekhai ni ooloka, Muluku onoorwa khumukuxa mutthu mwaamukhaani, oowiiyeviha, khupwanyulasa etthu iyo. Ekeekhai. Kweekwe ohira. Muluku khonrukunuwa. Onoomalamaliha eyo, atthu a muupuwelo wa murohoni anoorkhala ni Masu awo.

⁹¹ Mukihiye kooleleni. Kihaakhela ewarackha owaani, ya emosa wa ikereja sooreeraxa, mitthenkeso suulupale sa mweethiho wa Pentekosite. Muthiyan'ole namuhaawi oowiiniwa murima orookilepela ewarackha. Nto owo khwira, "Munna Branham, kaahikhalana maihi oorakama ni kaarina mukopwe wootthukiwa ottuli." Owo khwira, "Nto e. . . Aiy'aka yaanaasivela." Nto owo khwira, "Hiyo khuthaama epooma weiwo waarinaahu ekereja yaari ya erooho saana, khurowa ekereja ela yuulupale, ekereja yoopacerya ya mpooma." Nto khwira, "Vaphiyaly'ahu iwe, axinna athiyana aPentekosite othene yaahimettha maihi aya." Ni khwira, "Awo khukithipelela miyo mwaha wa yeeyo. Miyo khwira, 'Nnari, nnari. Miyo kinnaamini wira Bibilia onihimya wira nihiireke yeeyo; ti yoohittitimiheya wira yeeyo.'" Nto siiso owo khwira, "Vano

awo khukhala . . .” Awo yaanimutheya, yaaira, “‘Eyi, yawinyu—epenewu anyu enoophunyala ottuli, yoowuurela anyu,’ ni sothene siiso. Ni khwaathipelela aiy’aka, mwa enamuna emosa, mpakha awo okikhanyererya omettha maihi aka.” Ni khwira, “Miyo kiniisoona ottheke, okhuma vaavo.”

⁹² Muupuwele yeeyo, ekereja ya Pentekosite yaatthuneya weemererya Masu a Muluku! Ti vaavo mutthenkeso anyu onoorihaayani-vo. Ekeekhai. Anoohiya wiiwa Nsu nle noomaaleleya naamukhaani na Masu, niniwiitthanela mw’ekeekhai. Othene anwiryana ittheke sinoopa ni ikuru, ni onyakula wunci-ene ni wiina, ehimyaka wira ahaana oweriya. Eyo eri saana. Miyo kinnaamini yeeyo, nave. Masi, munna, mwaaweryaka wiina n’unyakula, vano nto khunarukunuwa n’ukhootta Masu a Muluku, ni otthara makhalelo a olumwenku, yookhala etthu evonyeiyeye nipuro nlo. Ekeekhai.

⁹³ Erooho ya Muluku enookhuruwa, Nsu nle noomaaleleya naamukhaani, ni oweettiheryani olukama oKalvario, vaavo hiyo nikhwiyaahu, nto ekumi ahu yoosukiwa mwa Muluku ni Kristu, ni khutthittiwa ekanyeryo ni Erooho Yoowaarya. Vano, Masu awo paahi t’ankhala mmwe. “Vano nyuwo mwakhala mwa Miyo, nave Masu Aka mwa nyuwo, nvekeleke etthu entthunaanyu nto munoovahiwa.” Vo ti vari evirikanelo.

⁹⁴ Kinwehererya wira nkinkhala ntoko namathipelela wa nyuwo. Kakhala vale, nki—nki—nkinsuwela. Miyo—miyo kinnaamini wira Masu a Muluku Ekeekhaii, ni Awo ahaana okhala vaava va. Ni yakhala va, Awo animwiisooniherya Mmansaya ota. Ahaana wira! Makhalelo anyu, ekhalelo anyu yothene, enookhala yoovirikana.

⁹⁵ Tivo okathi Muluku aanvahalyaawe Abrahamu wehereriwa, owo aahivira, ipursento emiya. Ni aamurowa . . .

⁹⁶ Muluku khokhanle ovahaka mutthenkeso wehereriwa, okhala wira wothene ti wootapanyeya. Muluku khoniira siiso ni mutthenkeso. Owo khonvara muteko ni ilapo munlokoni n’Amalapo. “Owo aakuxale atthu wa Amalapo.” Isarayeli, Owo okunxe nloko. Masi, w’Amalapo, “Owo aakuxale atthu wa Amalapo mwaha wa Nsina Nawe.” Vano, moone, kuhiyo mutthe- . . . Kuhiyo mutthenkeso. Ti mutthu mmosa Owo onimukuxaawe mwa Amalapo.

⁹⁷ Nto okathi wehereriwa onrwaaya, munnoona eniiraneya? Hiyo nikhumenle okhalihwiwa naxariya. Hiyo nihaakhela opatiiso wa Erooho Yoowaarya mmweettihoni mwa pentekosite. Masi vaphiyenryaaya okathi wo wehereriwa, anaakuxa atthu oosoma saana, antthuna akhaleke ntoko olumwenku, siiso ntoko saaryaaya mahiku a mweettiho wa Wesley ni othene aya akina. Awo anoorowa oxikola. Awo—awo animuxutta siyensiya. Ni aniixuttaka itthu iya sothene sikina sinrowa vamosa n’usoma. Ni awo amphavela wiixutta pisikoloxiia. “Etthu yooreeraxa, ahe,

muhihimyeke *ela*. Yiireke *ela* ni *ele*. Okhala wira eyo eno. . .” Moone, nyuwo munoothukumanya n’uteka. Yawinyu—yawinyu—etthunelo anyu ti yoohiloka. Niwoko nanyu ti noohiloka. Nyuwo munikhaliherya mutthenkeso ohiya okhaliherya niwoko na oKalvario. Muniwerya sayi okhaliherya niwoko na oKalvario, muhikelaka ni ephiro ya Masu?

⁹⁸ “Maana ninrapihwiwa ni maasi a Masu.” “Nyuwo mwakhala mwa Miyo nave Masu Aka mwa nyuwo, vano nvekeleke etthu entthunaanyu.”

⁹⁹ Ti vaavo ninoonaahu oxinttiwa wa mweetthiho wa Pentekosite, okhala wira awo animwiihuluxa Masu. Masu anihimya etthu emosa; awo anrowa weererya wiiriha mutthenkeso owo okela mmo nipuro nlo. Nto animwiihuluxa Masu awo, ni wiitakanxa ni mutthenkeso. Nto munnoona otthu aronwaaya—wo? Aahalela okhala ntoko ikereja sikina. Masi nto ninimwiina ni onyakula, ni olavula ilavulelo, n’utupha osulu ni vathi, sothene iyo siri saana. Mutthenkeso aya ori saana. Kinwehererya wira koolavula voowiiweya. Masi etthu ene t’ila, Nsu nle noomaaleleya naamukhaani na Masu nilavulaka. Ti yeeyo.

¹⁰⁰ Nyuwo munoovira mowehereriwani. Muluku onoowehereryani ntoko Owo saamweeherenrye awe Abrahamu. Owo onimwehererya Osuulu w’Abrahamu, nuumala owo. Nto vano, etthu ehinkuxeryaahu mukhora wa nwanani, etthu sinikhalelaaya itthu sinci-ene eriyari ahu, okhala wira khaninwerya ovilela wehereriwa. Nto mukihiyee kooleleni etthu emosa, wehereriwa wa Masu ti woolikana.

¹⁰¹ Etthu nihikhalanenyahu, ni nihinrowaahu okhalakhala nikhalanaka. . .mmutthenkesoni. Kinoona wira aPentekosite arina mitthenkeso sooreera. Akina wa axilopwana ooreerelaxa miyo. . .ari. . .ankhala elapo ya vathi aniira mpantta wa seiyo—mitthenkeso seiyo.

¹⁰² Asempeleya a Muluku, miyo kookhalana apatthani mmo. Wulu! Munna mmosa wu oIndiana, kinaamini aka, wira kinoorowa, okhalana muthukumano, ni yoowo, vahilekenle. Munna Roy Weed, owo mukhulupale a etistritu estaatu y’oIndiana. Kookupali wira owo mulopwana mmosa ooreera murima. Ohiya vo, owo mukhulupale a etistritu a Asempeleya a Muluku.

¹⁰³ Ya ikhomo xexe, oh, wulu, kavi! Ralph McPherson ni anci-ene a axinna awo, akhanle axilopwana ooreera murima, hat’etthu mmakhaleloni mwaya. Awo atthu ooreera murima.

¹⁰⁴ Wa aUnisista, yaawo aniisihana, Unisista. Wala, vano, kinoona wira nnari. . .Awo anniisihana ekereja ya Nsina na Yesu. Jack Moore, omuromola mmosa paahi a. . .Aakhala imiya sene a yaawo, axilopwana ooreera murima, atthu ooreera murima, atthu oothunku.

105 Masi etthu ene t'ila, munna, t'ila, mwaapharelelaka mutthenkeso yoowo. Munnona? Muluku onkuxa mitthenkeso iyo, ni—ni sothene iyo ti soomora. Nkaaweheni, itthu sa molumwenkuni sikelaka-mo. Nkaaweheni axithiyana aya. Nkaaweheni axilopwana aya. Nkawehani mukhalelo aya. Miyo kaamuwerya woothoonyeryani, atthu a Asempeleya a Muluku arina matiyaakono munikhuruni mwaya, athenle vaara vaili wala vararu, alaleyi yiisetihaka voohiloka. Athiyana ni maihi aya oometthiwa, yaawaraka akaputtula, wiipintari, ni nlelo anihimya okhalana Erooho Yoowaarya, ettharihelaka eyooniheryo y'olavula ilavulelo, wala otupha osulu ni vathi, wala okhuwela.

106 Awo anoovonya wiiwa Nsu nle noomaaleleya naamukhaani na Masu. Masu anookhalihani oolipa ni mwiikimanyo. Ti vaavo eryaaya. Mwaha wa yeeyo nihirinaahu maprofeta ooloka mukereja olelo, ntoko Hakapu.

107 Mwaha wa yeeyo, ekereja olelo, awo—awo onaarikelaaya ottittimiha olavula ilavulelo mutthu aalavulaka, okhala wira awo khareere wiiwa soowooothererya sinci-ene ni evutukavutuka, mpakha ahinsuwelaaya ekhanle yooloka ni yoohiloka mwa yeeyo.

108 Itaphuleliwo sikhanelle soowaanyiherya pure paahi, mutthu ohimyaka etthu paahi mwaha wo wira onniisoonaweetthiheriwa. Iwo kuhiyo otaphulela. Otaphulela; kahi mutthu ovenya n'ulavula ilavulelo, mukina ovenya minuutu vakhani n'utaphulela etthu ole ohimyyaawe. Mmosa aalavulaka, mukina onootaphulela vaavale vene, ahimyaka nuulumo ni nuulumo, ehimyeryo emosaru, itthu sothene imosaru. Mulopwana *ola* pooti okhala alaleeryaka, masi kahi otaphuleliwa. Akina aya, muthinto *ola* wa nsu nivahaka etthu, *ola* ottuli nno avahaka etthu ekina. Ni akina anihimya moolumo muloko, akina annihimya moolumo miloko mithanu ohoolo waya, ntoko otaphulela.

109 *Otaphulela* enihimya “olavula, nuulumo nnuulumo.” Yakhalaru Masu a Muluku, ehaana orwa, nuulumo ni nuulumo; yooruma vasulu va yooruma, yooruma vasulu va yooruma. Ti siiso Masu arinaaya orwa.

110 Masi exeeni ninoonakaahu? Iyooothereryo sinci-ene! Vano awo ahiira eyo, wira, ohiya okhala ni Masu, awo ahenle-mo yeeyo mmo. Mutthu amalakaru wira yeeyo, awo yaamwiihana muPentekosite. Nto moosuwela eniiraneya.

111 Okathi onrwaaya weeheriwa, okathi wo weeheriwa, nto Epyo enoopacerya, enimooniherya t'evi ekhanle Epyo ni t'evi ehikhanle. Vano, voohicala etthu yaakhumelenle, Abrahamu aahikhala ni Masu, natiri.

112 Masi olelo mutthenkeso khonwerya wira eyo. Ni amosa-amosa wa nyuwo axinna oophenteya muniira mpantte wa

mitthenkeso iyo, nyuwo nvaanyihane n'awo emaara emosa, nyuwo moosuwela onrowaanyu. Akavi a nyuwo?

113 Miyo nkinihimya, mpaani mu vano, masi akavi atonko okhala muskiritooriyu mwaka, akavi atonko okhala ni miyo, ni wira, "Munna Branham, hiyo noosuwela wira eyo Ekeekhahi. Masi hiyo noomoliwa va, ninrowa wira exeeni?"

114 Munna, ninrowa wira exeeni? Nvarelele oKalvario, munvarelele natiri, nvarelele vamwiikimanyo, voohicala enkhumelela.

115 Ni awo aakhalana, axilopwana ooreerelaxa mmwe. Munnona? Masi emphavelaaka wira, ohimya wira, eyo ehaana ovonya. Kweekwe ennivonya ni okathi wothene enoovonya. Masi ti, ovonya wala ohivonya, ni Muluku, mukhale ni Masu a Muluku ni natiri Awe, toko. Munimwehereriwa ni Yaawo.

116 Nyuwo munoolepa nsina mpapheloni, wira munimwiira *ela* wala mwiire *ele*. Hata voovirikanya Masu, nnakhala vo munoolepa. Ti yeeyo. Mmurimani mwanyu, munnisuwela wira ti yoonanara. Nlo Nsu nenle noomaaleleya naamukhaani nilavulaka, Masu yaawo. Khivanxankiha hiyo ohiweryaka okelela ohoolo, okhala wira yookhala ethhu ekhumelenle. Murimwiivalaaniha Nsu nle noomaaleleya naamukhaani. Nyuwo murookhuma mwaakuvaxaka. Muluku aamuwiihanani, masi nyuwo murookhuma mwaakuvaxaka, okhala wira itari saarooruma, overunya waahikukutteya, mwaako waahittikinyeya.

117 Eyo khiyaamuthukumelinhe Eliya, profeta ole. Owo aathuna Nsu nenle, toko. Owo iirale, "Miyo kinookhala vaava."

118 Anci-ene olelo, aapacerya, miteko sa ovoniha, wiilikanyiha wa mw'erutthuni, inamuna sothene sa itthu, ni miyoonelo hata sihimphwanyaneya Mmasuni a Muluku. Ti yeeyo. Exeeni iyo? Nihaana wiipa nsipo nle, "Ale anaawehererya Apwiya. Mukihiye kiyevihe wiisoona waka kiiythane Nsina Nanyu. Mukihiye kilipelele, Pwiya, mpakha kiiwe Nsu nle noomaaleleya naamukhaani." Nto Nsu nlo ninrowa okhala Nsu na Yoolempwa. Nlo ninroa olavula voolikana ntoko Masu. Amen. Vaareera.

119 Ninnimoona, Abrahamu vaamanlyaawe oheliwa, wiithaneliwa okhuma, oovalaanihiwa n'ale oophentiwa awe, ni amusi awe, ethhoko awe, amusi awe, orowa muttethe w'emalapo. Mwaha wo waamini owo aahiira yeeyo. Vano, okhala wira owo aahiira, Muluku aahinvaha olyihiwa masoma, wira ooniherye wira owo aari mwaana a Muluku, wira aanimwaamini Owo okhala wira aamwaamini natiri. Nnakhala vo, owo khaawerya, owo khoona v'ephattu, masi aanihimya wira, "Ethhu p'itthu yoovirikana ni Masu a Muluku waari wootha." Khencala eyooniheryo xeeni enikhumelela, nlelo woothiwa.

¹²⁰ Okinanara ohimya ela, masi kihaana ohimya. Nkawehani. Nto mwaawoonaka athiyana, miyo kinoohimya ela ntoko etthu enooneya, enweryaneya woota, anihimya okhalana Erooho Yoowaarya, nave oohiratta voophiyerya wira—wira ahiye maihi aya yinnuwe, yookhala etthu ehilonke nipuro nlo. Muthiyana onrowa owara ekuwo eri ya mulopwana, ni owara, Bibilia ahimya wira, “Ti yoonanara wa—wa Muluku, muthiyana owara ekuwo eri ya mulopwana.” Vano nto nyuwo munihimya wira muhaana Erooho Yoowaarya ni wira yeeyo?

¹²¹ Miyo kaahilavula yeeyo nihiku nimosa Oregon. Aahikhala muthiyana mmosa aakilepenle ewarakha yuulupale. Owo khwira, “Munna Branham, nyuwo murina muteko wooreeraxa, masi vekeekhai munoothonona.” Owo khwira, “Vano, ankhil . . .” Khwira, “Miyo kininwara makakawu okathi wothene.” Khwira, “Ankhil kaaronwe owortha orukula—ewortha, kinwanre-ene evestiitu. Khimunoona wira yaamukhala yooreera saana ni makakawu ovikana saarowaaya okhala, wala makakawu, enakhaleru exeeni, ovikana owara evestiitu?” Ni khwira, “Nkawehani, miyo kinniwela miyaako n’aximiravo yaarowaka osukiha imompe, ni,” khwira, “kinnirowa nipuro noowaatta ipwilimwithi.” Khwira, “Vano, ni e—ni evestiitu, saamukiluma miyo othene. Ni makakawu khasinikhaaxa.”

¹²² Miyo khwira, “Eyo ti yoopeepheyaxa ovikana muhusi opakiwe ni muuttutthi wa mwalakhu okhwiye etala. Ikharari! Khanikhanle hata Nuulumo nimosa na Muluku mwa yeeyo. Owo muupuwelo anyu yeenyu.”

¹²³ Muluku ohimye wira, “Moolumo othene woothiwa, ni Awawe ekeekhai.” Amwaar’aka anniwara evestiitu. Awo annirukula etthu nwortha. Awo kharina hata mukattyamiho ni yeeyo. Ni, khula enamuna, muthiyana khorina etthu yo okhalaka mnikhuru n’alopwana iwo, osukihaka inama, khula enamuna. Owo aahaana okhala nipuro onaapeiwa weiwo okhanle opuro awe. Ti yeeyo.

¹²⁴ Aneererya ophwanya ntthyawelo paahi, masi khanikhanle. Masu a Muluku t’owiiweya, ni muthiyana oyariwe ni Erooho ya Muluku ono . . . Nto mulopwana oyariwe ni Erooho ya Muluku khonaahiya amwaar’awe wira siiso. Owo aahimye exeeni? “Muthiyana ommettha maihi awe, khonttittimiha muru awe.” Ni aiy’awe t’akhanle muru awe. Owo t’ohittittimiha.

¹²⁵ Vanreerela kimaale. Vaareera. Vano, moone, moone, ti yoophiyerya. Nyuwo moosuwela etthu enihimyaaka.

¹²⁶ Miyo nkinihimya eyo mwa etakhalelo. Kaahimya mwa etakhalelo, Muluku amorele ikharari murima aka w’etampi; akihiye kipiye va valtaari ula, kirukunxe murima.

¹²⁷ Miyo kinihimya eyo apatthani, okhala wira, kinnoophentani. Ni kimphavela wooleelani ele ekhanle ekeekhai, ni awo Masu a Muluku. Nihaana wiiwa Nsu nle naamukhaani na Muluku,

wira nikhale voolikana ni Masu. Ninvira okathi wo wehereriwa. Aleluya!

¹²⁸ Munnoona wira nuumala ophiya okathi owo wo wehereriwa, ekhapelelo eyo ya mwaan'owo oyariwe mw'emusini wa muromolelo? Owo avilelaru wehereriwa ni khukhala ni otthuna wa atithi awe, vano aamukuxiwa mmiravo owo khuwarihiwa ekuwo, vano nto naapakiwa niira. Vano mmiravo owo aamukhalihwi voopuroni mw'emusini oyariwaawe-mo.

¹²⁹ Owo ti mulattu n'aPentekosite ahu olelo. Awo anootupha paahi *va* ni *vale*, ni mitthenkeso sahu sinimwaapurulela epantte *ela* ni epantte *ele*. Awo khankhala ni Masu.

¹³⁰ Nyuwo mwakhala ni Masu, vano Muluku, oonaka, "Nyuwo mwakhala mwa Miyo, nave Masu Aka mwa nyuwo," Awawe, Owo khokhanle ookhoottaka Yaawo, Awo Masu Awe. Vano onookhala okathi, nihiku nlo, munrowaanyu okuxiwa muheliwe epantte aya, nvahiwe etthu eri yooloka, aleluya, owerya wa Muluku Oowerya sothene.

¹³¹ Kiireke, Muluku onaawehererya an'Awe, masi awo khaniilokiherya, yaaphiyaka okathi owo wo wehereriwa. Munookupali? "Ahe, ekereja enookoomola." Vaareera. Eyo vo. Weeso, rowakani. Owo kuhiyo Osuulu w'Abrahamu. Osuulu w'Abrahamu khoniira siiso.

¹³² Osuulu w'Abrahamu! Vano, voohicala etthu xeeni jaarwiiye voovirikana ni Abrahamu, owo aahikhala oolipa ni Masu ale a natiri, aahikhala ni yaawo. Voohicala moota xeeni Saara saarwiiyaawe, akina saarwiiye aya, oohiyana-hiyana saarwiiye aya, sothene, owo aahelenle ntoko sahaakhanle. Owo aahiweha, aahaamini wira aaniwerya omoona natiri, okhala wira Muluku aahimulaiherya, nto eyo yaari yothene yaakhanle. Yaari Masu a Muluku, aahikhala vale oolipa.

¹³³ Vano Owo aahinvaha wehereriwa iwe wookiserya. "Kinonvaha ipantte piili, ni kinoomwehererya." Vano, owo ookhalana mwaana. Owo onnoona wira ookhalana. "Masi vano Miyo kinoomuleela, 'Mmukuxe mwan'owo mmwiive.' Ni mmuhiye mwaan'owo, oonaru . . . Owo onoomwiiva mwaan'owo? Miyo kinrowa omwehererya vano."

¹³⁴ Abrahamu, oororomeleya ni Masu! Ntoko, okathi nyuwo onimwaakhelaanyu natiri, enrowa weemexiwa sayi etthu iyo?

¹³⁵ "Moota—munrowa sayi o—munrowa okhalakhala sayi nwehereryaka okhala tiithi a maloko, nto va nyuwo murina miyaakha emiya ni muloko ni mithanu vano?" Isakhi mwaamukhaani, oophiyaka miyaakha muloko ni mixexe, muloko ni mithanu. "Munrowa okhala sayi tiithi a maloko murine-ene miyaakha emiya ni muloko ni mithanu, va ori mwan'inyu mmose-ene, vano nyuwo munihonona eyooniheryo anyu emosa yeeyo murinaanyu?" Amen.

136 “Kinrowa ophwanya sayi mureerelo kakhuma-ru mmutthenkesoni mwaka? Kinrowa ophwanya sayi mureerelo kaira-ru *yeela?*” Oh, nwiriyane Nsu nle noomaaleleya naamukhaani ni murwe Mmasuni, Masu.

137 Nyuwo muniira, “Miyo kihiiwa nsu okileela *ela.*” Nakhalaru noovirikana ni Masu, khanaari Nsu na Muluku. Nsu na Muluku ninrweela Masu.

138 Nto Abrahamu aahiwela mpakha vaavale vootthariha Nsu, Nsu noomaaleleya, naamukhaani na Muluku, voolikana ni Masu a Muluku, aahaana okumiha ekumi ya mwan’awe yoowo.

139 Owo khwira, “Muhookole ntata nanyu, Abrahamu. Koosuwela wira munnikiphenta vano. Ni othene ale nuumala nyuwo, aleluya, othene ale anrowa orwa nuumala nyuwo, anrowa otthuna okuxa Masu Aka, anrowa okhala Osuulu anyu, nto weiwo anookuxa mukhora wa nwanani.”

140 Kaatthuna kirine-ene okathi wira kooleleni etthu yiiraneiyeh mahiku vakhani avinre, moone, etthu yiiraneiyeh. Oh, wulu!

141 “Onookuxa mukhora wa nwanani; Osuulu anyu nuumala nyuwo. Abrahamu, ole onrowa wooreerihani onooerehiwa, ni ole onrowa wootakhalihani onootakhaliwa.” Yesu ohimmye wira, “Fataari otthukeleliwa nxilo muxikoni, ni oriheliwa mphareya eriyari.”

142 Ni mitthenkeso iya sinaakhootta axilopwana awo oomuttittimiha Muluku, mwaha wo wira aheemererya Ekeekhai, Masu, ni Erooho ni owerya wa Muluku, n’ukhala ni Masu, munnoona etthu ekhumelenle? Nyuwo munimwiirihela mphareya wa eliyalelo.

143 “Fataari otthukeleliwa nxilo muxikoni, khuriheliwa eriyari y’ephareya, ohikhanle omutthekiha mmosa wa axikhaani Ala oottikitheliwa.” Awo exeenii? Osuulu w’Abrahamu onikhala ni Masu a natiri.

144 Ikereja sahu kamosa-kamosa sinniphierereya nipuro awo ankhoottaaya, awo anookhootta ovoniha wa Muluku, awo khandthuna-tho mukereja mwaya. Ti yeeyo. Mitthenkeso sahu sa Pentekosite khasinthuna-tho ovoniha wa Muluku. Exeeni iyo? Khamunoona moota xetwani onivaraawe muteko? Owo oroovira iwe khuhimya itthu soowootha siiso. Nto atthu a akhili paahi yuupuwelaka wira atthu a erooho, nto anooweha yeeyo, ni wira, “Nkawehani *ele*. Nkawehani *ele.*” Miyo nkiniweha eyo.

145 Nyuwo mwakhala Osuulu w’Abrahamu, munoonweha natiri a Muluku, etthu Muluku aahimaly’awe wira mwiire wa yeeyo. Ti yeeyo. Osuulu w’Abrahamu, hiyo nimmuweha natiri. Khenikicala akavi ammora epantte *ela* ni akavi ammora epantte *ele*. Natiri onikhala eekeekhai.

146 Nyuwo muhaana ovira mowehereriwani mmo. Munnona? Ayo. Abrahamu, oowehereriwa toko, vano nto khutthitiwa

ekanyeryo, vano khumwaakhela natiri wira “Osuulu awe waamukuxa mukhora wa nwanani.” Okisivela eyo. Vano, awo yaahikuxa mikhora sa nwanani aya vaamanly’aya weehereriwa.

¹⁴⁷ Etthu ene, okhala wira khaninwerya ovilela weehereriwa. Mwaha wa yeeyo mitthenkeso sahu sihinweryaaya ovilela weehereriwa. Kahi otthuna wa Muluku. Ti, Muluku ooreeriha, masi kahi otthuna wa Muluku. Okhala wira, moone, nyuwo murina ikupaniya sothene s’atthu nno ni ikupaniya sothene sa akhili, nto animwaatakanxa vano ankhuma ni yooreeraxa anweryaaya. Akina aya aniira, “*Ola* mutthu muulupale. Khimukhanle okhooataka nuulumo nawe.” Ahe, enoolikana enamuna emosaru ekereja Katolika yiithokihalyaya, etthu emosaru, vasulu wa nikhuru n’alipa-oowaamini oothokelela. Alipa-oothokelela, awo anooweha eyo, anoolikaniha ni okathi. Khimukhanle wiiraka yeeyo. Itthu sothene sikina wootha masi Masu a Muluku.

¹⁴⁸ Abrahamu khonaweheke hat’etthu woohikhala natiri a Muluku. Voohicala wira yaari exeeni, owo aahikhala ni natiri a Muluku.

¹⁴⁹ Vano mwaha wa yeeyo nihinoonaahu-tho. Mutthenkeso khonwerya okuxa mukhora wa nwanani. Khasireere miyuupuwelo soohilipa-lipa mmo.

¹⁵⁰ Ontthuneya mutthu voomeekha, onkuxa mukhora wa nwanani. Nyuwo munoowerya wira mwatthuna vale. Ayo, mulopwana.

¹⁵¹ Nrowe naatholathole amosa-amosa, minuutu vakhani, noone vakhala wira annikhala mwa Yoolempwa.

¹⁵² Vano, waahikhala okathi oPapilooniya okathi yaakhanly’aya e—elatarato yaapakiwe, yoolikana saana ni ekereja Katolika, ni othene yahuuramela elatarato eyo yaamurowa opahiwa muttukutthani mwa mooro. Vano, eyo yaari eyooniheryo, sinto awo yaarowa okhala oolipa, okathi Muluku iiraly’awe, “Muhikhalane amuluku akina kihikhanle Miyo, wala opaka elatarato ya etthu p’itthu.” Ti yeeyo Muluku ohimmy’awe. Waahiphiya okathi wo wooniherya.

¹⁵³ Isarayeli othene aahihyererya. Nto varumalyaaya nlope, ni pa—ni pankwe khuruma, ni e—ephivi khuruma, vano, awo othene yaahikokhora ohoolo wa elatarato ela.

¹⁵⁴ Masi yaahikhala araru aya yaairale, “Khayiriwe etthu.” Awo yaahiiwa Nsu nle noomaaleleya naamukhaani, ni khukhala voowiiwanana ni Masu. Awo yiirale exeeni? Yaahikhalasa ni Masu.

¹⁵⁵ Nto nuumala, awo—awo—awo khwira, “Mwaahiire... Ninimoovahani okathi mukina, ahiiso ninimoorihelani muttukutthani mwa mooro.”

156 Khwira, “Muluku ahu onniwerya onoopola muttukutthani mmo mwa mooro.” [Nipuro vahiitthu mufiitani—Mol.] “Masi, nnakhala vo, hiyo ninrowa okhala ni Masu.”

157 Vano, munna, anghi nyuwo? “Kinrowa wira exeeni, Munna Branham?” Mukhale ni Masu. Mukhale ni natiri. “Ekerej’aka enookitthyawa.” Mukhale ni natiri. Awo ahaana olakaseya, orimeela nihiku nlo, khula enamuna. Masi, Muluku nnari. Mukhale ni natiri. “Ahe, miyo kinimooleelani, awo anookoomola.” Mukhale ni natiri, vamosaru paahi. Mukhale oolipa ni natiri. Vano, nyuwo mwawerya-ru okhala ni natiri ni okhala vaavo, mukhale ni yaawo weeso.

158 Mukhalane opatthana n’atthu othene. Masi vano va, vano, nyuwo khamunrowa oxintta enamuna ekina ohikhanle opatthana ni atthu othene. Muhaana okhalana. Vano, awo yakhalaru ootakhalaxa, oohifayi, vano mwiihuluxe eyo. Ti yeeyo. Muhikele vapuwani va nwanani. Masi vakhala-ru wira mumphavela omuruuha munn’inyu, eyo ti yoovirikana. Munnona?

159 Vano nwehe, masi nyuwo khamunkhalakhala mphwanyaka muupuwelo wa mutthenkeso, mutthu mmosa, nnari, mulopwana, okathi, awo yakhaliharu malamulo aya “Hiyo ninaamini *ela*,” vaamala. Nyuwo mwaalepa mwiiixuttiho anyu, “Hiyo ninnaamini *ela*,” nave-tho, yaamukhala yoovirikana. Vaamala enihimya, “Hiyo ninaamini *ela*, ni nyuwo muhaana okupali *yeela* ni olepa epaphelo *ela*, ahiiso yoomala.”

160 Masi mwahimya wira, “Hiyo ninaamini *ela*,” nave-tho, “ni ele nikhanyaahu oxuttaka wa Muluku. Niri ootthukuwa wa Erooho Yoowaarya,” vano munikelela ohoolo, munna. Ayo. Eyo enrowa okhala yoovirikana vano.

161 Masi, moone, mwakhalana-ru yoolempwa ni yookiserya vaavo, ni Muluku onavaha etthu ekina enoorwa, enooniherya okhala Masu Awe, Ekeekhai, khivanweryaneyya nyuwo wiittikinya, okhala wira ti “vaamala.” Eyo ennimaliha mwaha. Ti vaavo aLuteraano akhwiyaaya. Ti vaavo aMetotista akhwiyaaya. Ti vaavo aPatista akhwiyaaya. Ti vaavo aPrespiteriyaano akhwiyaaya. Ni ti vaavo aPentekosite ankhwaaya. Ti yeeyo. Ti yeeyo. Awo anookhwa vaavo vo, nkawehani paahi, okhala wira ti—ti yoolempwa. Khiyaavo etthu nyuwo—nyuwo munweryaanyu waacererya wala okumiha-vo. Ori—ori vaavo. Owo mwiixuttiho anyu.

162 Lutero khaawerya okupali oreerihwa. Nnari, mulopwana. Owo iirale, “Naxariya onookhala mwaha wo waamini.” Kahi Martinho Lutero; masi nikhuru nle naamutthanre. Ti yeeyo.

163 Kahi John Wesley; masi nikhuru nimutthanre. Ti yeeyo.

Kahi Kalvino; masi nikhuru nimutthanre yoowo.

164 Kahi John Smith a ekereja Patista, yoowo aavekelelaka ekereja awe vanci-ene, ohiyu, mpakha maitho awe yaaipaaya; ni amwaar'awe yaahaana omweettiherya ota ni omulyiha ni ekhwiyeri, vameesa. Kahi owo; masi nikhuru nla n'aPatista nimutthanre, mutthenkeso orwiiye ottuli wawe.

Kahi Alexander Campbell; masi ale amutthanre yoowo.

165 Kahi mweettiho wa pentekosite wopaceryani, yaawo jaarina itthu sothene vamosa, ni yaapatthana n'atthu othene; masi makhuru arwiiye khwira, "Nnari. Hiyo na *ela*, ni hiyo na *ela*. Ni *iya* ti sikhhanle myaha, ni ti yeeyo!" ("Yiivalanyihaka mmansaya, ntoko ohikhalana Waamini.") Ekeekhai. Ti yeeyo yiirihale. Yookhala etthu yootakhala. Amen. Kinnoona okhala natiini, voosiis'ula.

166 Aana aHeperi, vaamanlaaya ovilela weeheriwa, sinto yaarowa okhala epantte wa Masu a natiri, wala nnari, awo yaahiheliwa mowehereriwani. Nto awo yiirale exeeni? Awo yaahikuxa mukhora wa nwanani. Amen. Mwaha wa xeeni? Awo yaahikhalasa Mmasuni.

Mukhale ni Masu, Nsu nle na Muluku ninlavula ni nyuwo.

167 Vano, otthokelela wothene wiirale, "Vano, nkawehani. Papilooniya, khiyaarowa okhala yoovirikana. Okhala wira, hiyo, nuuramelaka elatarato ela, nimmukokhorela Muluku, khula enamuna. Ahe, naairaka *sa*, ninthuna ohimya *sa*."

Mwiire ntoko Muluku sihimyaawe.

168 Ankhi Muluku iirale, "Moise, murule ixapattho sanyu, Moise. Muri muttethe woowaarya."

169 Owo aairale, "Kooxukhuru, Pwiya. Miyo tthiri kinniwaaminini. Ohiya vo, kinrula exapheyo. Ovariha muteko otaphula exapattho aka." Uh-huh. Huh! Khiyaarowa ovara etthu.

Owo iirale, "Exapattho." Owo khaahimye wira "exapheyo." Ekeekhai.

170 Muhaana orwa, eliinya ni eliinya, ele Muluku enihimyaawe, ni wiilokiherya ni Masu Awe.

171 Vano, vaamanlyaya ovira mowehereriwani, awo yahikuxa mukhora wa nwanani wa mooro. Awo yaahoono wira, varowanse aya mpakha wookiseryani, ekhalaka mwa Masu a Muluku, awo yaahikuxasa mukhora. Ti yeeyo. Numala . . .

172 Daniyeli. Yaahikhala elaleeriwo, ni yaalempwe ni aMedo-Persa, yahaaweryaneya orukunxiwa, wira, "mutthu aanvekenleru muluku mukina, ariheliwe mulittini mwa amwatto." Ni Daniyeli aanisuwela wira Masu a Muluku yaari, wira avekeliweke Yoowo paahi, vano owo aahihula icanela khulompa khula enamuna. Vano, owo khaakhanle vanloothoni. Owo

aahunle icanela awehaka empa m'olompa. Owo khuuleliwa muru yeeyo.

¹⁷³ Ni hiyo khanintthuna otthara etiini ahu Ttiminku, nto Sekunta wira etthu ekina. Wala, waamini mmurimani mwahu etthu emosa, orwa ohoolo wa mutthu mukina ni wira, "Ahe, nkisuwente. Ayo, kinoona wira mookhalana exariya." Mukhale ele muryaanyu. Mwaahikhale, mukhume vapulpitu, mukhume mukereja. Ti yeeyo. Okhala wira, nyuwo mwa oohaaxa wa soopiili. Mukhale ele nyuwo mukhanlyanyu. Muhimye ele munaamini anyu, vano khamunrowa okhalana yo wooniherya. Nyuwo mumphwanyaneya vekeekhai mwa ele eri ekeekhai. Atthu othene annisuwela mukhalelo anyu wa murima. Atthu animoottittimihani, khula mutthu.

¹⁷⁴ Muthiyana pooti okhala onanara voowereya. Owo pooti okhala a mwiitti, ooneneva, mukhani, oowootta, a maihi ooriipa, maitho ooripelela, maitho oottweelela; nimosa, enamuna emosa, ni nikina ekina. Masi muthiyana owo akhalaru oowisumaaliha, muhano, khaavo mulopwana mulaponi ahaarowa orula exapheyo ohoolo wawe, nakhalaru nttoittoit na mulopwana mwa yoowo. Ekeekhai. Okhala wira, owo—owo onikumiherya ele okhanlyaaawe, ni alopwana annittittimiha eyo.

¹⁷⁵ Vano Muluku onoomuttittimiha mulopwana onrowa okhala ele owo okhanly'awe, wala alopwana anihimya oKristu. Nikhale aKristu, oosareya Erooho Yoowaarya, ni Masu a Muluku, wala niliyale eyo. Khweeli. Okhala wira, mwa enamuna ekina, nyuwo munikhala enamirima miili, ni muttharaka makhalelo oovirikana. Ni atthu anoowoonani murowaka nno oniiniwa, ni onvura sikaro, ni itthu siiso, ni muhimyaka okhala muKristu, vano, moone, nyuwo munihela nluku nookwattula mphironi mw'akina.

¹⁷⁶ Nkoonani nyuwo athiyana, imaara sikina, moota ammetthaaya maihi aya ni wiiwariha ni wira n'uwara ivestiitu iya sikhaani, ekhalaka ntoko esalsixa yoonihaka sothene wala etthu siiso, ni erowaka iwo mphironi, yeetasaka, ni orakama wa ixapattho ntoko sa, yiittikinyaka mphironi. Iwo okhala mupentekosite? Vano i—ikereja sikina siniira, "Awo anihimya okhalana etthu ahirinaaya."

¹⁷⁷ Nyuwo mootthittiwa ni mooheliwa ekanyeryo ni Erooho Yoowaarya. Nyuwo khimukhanle musaala muniiniwa ohiy'ula ni mmoononi mwa mulopwana ohikhanle iy'anyu. ohiyu woottharelana, otthikela okereja ni wiina mapuro othene. Iwo kuhiyo okhala mupentekosite. Eyo enamirima miili. Iwo onanara.

¹⁷⁸ Nkinoohimiyaxani nyuwo. Masi, nyuwo munnisuwela, ifiita iya simpakiwa va sinrowa mulaponi mothene, ni kinlaleya ntoko wira ti sa mulaponi mothene. Miyo koonaka Muluku airaka, "Muhimye etthu," Miyo kinoohimya paahi, okhala wira

nkinsuwela otthu enrowaaya. Ti yawawe Yoowo okhapelela yeeyo. Mukhale ni Masu paahi. Ti yeeyo. Vaareera.

179 Nnari, Daniyeli khaarowa wuuramela elaleeryo aya, hata wira aamoomoliwa mmutthenkesoni wala nnari. Owo aahikhala vacanelani, ni aakhanle ni Masu a Muluku. Owo khuuleliwa muru Yaawo.

180 Exeeni yiiraneieye? Awo yaamurihenle mulittini mwa amwatto, masi owo aahikuxa mikhora s'amwatto. Mwaha wa xeeni? Ovuwa! Okhala wira Muluku ohimnye wira yawawe. . . "Osuulu anyu onookuxa mukhora wa nwanani." Hata wira nwanani xeeni, nyuwo munookuxa mukhora. Oh, imaara kavi naakhanlyahu. . . ?

181 Nkanweheni Moise, attharaka ephiro ya sooruma sa Muluku, aahirowa wEjitu, yaakhala wira itthu sothene saari soovirikana. Yaahikhala anamatakiherya amosa-amosa yaaronwe ni yoowo. Owo aahirowa ni ithoonyeryo—piili, wira ooniherye wira owo aaroorummwa. Aahiriha enowa, ni siiso.

182 Nto vale khurwa anamatakiherya, khurihela sawaya. Exeeni aakhanlyaawe wiiraka? Hat'etthu. Muluku khaamuleenle wira awo yaamurowa wira yeeyo. Owo aatthuna omwehererya Moise. Owo aari Ole aatthunihenrye wira Yane ni Yampere arihe inowa saya, ahiiso attootto aya.

183 Vano vale aaphwanyaneya Moise avaraka muteko awe. Khimurihela ttootto awe. Khuthatuwa enowa. Owo khwira, "Nkawehani ele, Farawo. Ti yeeyo Apwiya akihimenryaaya wira kirwe, kiire ohoolo wanyu."

184 Farawo khwira, "Murwaase nno, Yampere ni Yane." Awo khwaarihelasa attootto aya vathi. Awo khuthatuwa inowa, ele Moise aapakalyaawe.

185 Wiitho wawe waahixeerya? Nnari, mulopwana. Owo nlelo aanaamini wira Muluku aaroomuruma. Owo aahikhala ni natiri yoowo. Nto exeeni yiiraneieye?

186 Eri ntoko okathi munkhalaanyu ohoolo wa mikumano sanyu sa muthukumano s'ovaanela. Owiitho wanyu pooti oxeerya-wo, vakhani. Mukhale ni Masu.

187 Exeeni yiiraneieye? Naanaanoru, enowa ela yuulupale ya Moise yaahirwa khumirya iye. Muluku aahilipiherya. Nuumala wehereriwa wawe, owo iirale, "Kintthuna wira nyuwo, ni ethoonyeryo ela, mwaahiye aana awo arowe. Kintthuna wira mwaahiye etthikele owaani, woopuroni waya. Muluku orimoorwa wa wira ahimye, khukiruma wenna wira kaavuluxe. Kintthuna wira awo etthike." Owo khurihela vale.

188 Oh, wehereriwa waahirwa. Moise, munrowa wira exeeni, orukunuwa, orowa, wira, "Ahe, khino kaahivonya"? Nnari, mulopwana.

Moise aahikhala oolipa, "Muluku oroorama ela." Ovuwa!

¹⁸⁹ Muluku ahimya etthu p'itthu, mukhale ni Yeeyo. Hata wira enikhumelela exeeni, mukhale ni Yeeyo. Awo yawoomolani ni wira, "Hiyo khaninrowa wiiraana, khaninrowa wira *ela*," mukhale ni Yeeyo.

¹⁹⁰ Moise aahilipa. Exeeni yiiraneiyee? Owo aahikuxa mukhora wa nwanani awe. Aleluya. Xetwani khwira, "Miyo kinimwaatalela Ephareya Yookhwa ohoolo wanyu," masi eyo yaahitthukuwa. Awo khiyaawenrye-tho waavarelela wEjitu. Owo aahikuxa mukhora wa nwanani. Mwaha wa xeeni? Okhala wira owo aahikhala ni orummwa Muluku aanvahalyaawe. Sooruma sa Muluku, owo aahikhala ni Masu a Muluku vano owo aahikuxa mikhora sa nwanani.

¹⁹¹ Yoxuwa, vaamanly'awe ovira mowehereriwani. Owo aahikhala weiwe, khino, khumulapuwa Yordani arapelelaka, owo ni Kalebi, n'anamahottela. Vahokolonwe awe okhuma oYordani, awo yaahiphityasa oKadexi-Barne. Nto othene khwira, "Oh, hiyo napacerya-ru, eyo enoopwexakasa mitthenkeso sahu kapatti-kapatti. Khaninwerya okela."

¹⁹² Erooho eyo khenkhwa. "Oh, hiyo khanikhanle okhalana Eyo. Nawixuttiha-ru Yeeyo atthu ahu, ninrowa wira exeeni? Naamwaakumiha matiyaakono, oophiyaka nuusu, mukereja. Awo aathela vaara vaili, vaara vararu. Ninrowa wira exeeni? Hiyo, vano, naaleenle-ru axithiyana ahu wira yaahaana owara maihi oorakama, moosuwela etthu yaarowaaya wira? Yaamuhya ekereja. Nto naarowa wira exeeni? Vano, naamuhimmwa okhala a enamuna ya khalayi." Yesu aari a enamuna ya khalayi, nave. "Hiyo khanikhanle wiiraka eyo. Hiyo khanikhanle wiiraka eyo. Eyo yoonitepela."

¹⁹³ Moosuwela etthu oniphityaawe mulipa-oowaamini ohinikelela ohoolo. aHeperi, kapiitulu 6, annileeliherya. "Ole otonko omwaleeliwa, khwiira mpantte wa Erooho Yoowaarya, vano khumora, okhala oowuuluuliwa." Owo oroophiya mpakha omukaanoni iwe khukhootta ovira, ti yeeyo, ookhootta waamini voomalela.

¹⁹⁴ Okhala wira, Kalebi iirale exeeni? Yoxuwa iirale exeeni? Owo iirale, "Hiyo ninniweryaxa okuxa." Mwaha wa xeeni? Awo yaakhanle ni ele Muluku aalaiheryaawe.

¹⁹⁵ Vano, awo khwira, ale akina yiirale, "Ahe, awo t'okorosowa. Awo othene atekeleliwe makokoro. Awo ari *sa*. Vano, hiyo khinaarowa owerya waakwannya, mwa hata enamuna."

¹⁹⁶ Yoxuwa khwira, "Hiyo ninniweryaxa wira eyo. Mmaale, mwaatthu! Mmaale! Mukilaathi!" Amen.

¹⁹⁷ Miyo kinimooleelani, waamini etthu yuulupale, waarwaaka mwa Masu a Muluku. Owo khonoova nto. Waamini wookhalana mairi vatthirima, mitika suulupale. Oniira, "Mmaale!" Sothene sinthiyawela onloothoni, ti yeeyo, Muluku aalavulaka. "Nyuwu

mwakhala mwa Miyo, nave Masu Aka mwa nyuwo, muhimyeke etthu entthunaanyu.” Eyo vo. Oh, okisivela eyo. Hum!

Axetwani anoothukumela, ni anatampi
anoovenya;
Omwaamini Yehova onoottikinya khula etthu.

¹⁹⁸ Munwerya sayi okhalana waamini musuwelaka wira khamunvara etthu, mweettaka Mmasuni mwAwe, musuwelaka wira sookhala itthu vo mwaarinaanyu ohimyaka nave khamunihimya? Sookhala itthu vale mwaarinaanyu wiixuttihaka nave khamuniixuttiha. Sookhala itthu vo muhinweryaanyu ohimya, nto munwerya sayi okhalana waamini musuwelaka wira moovonya?

¹⁹⁹ “Murima ahu waahinilamuleke.” Eyo eri vo. Eyo eri vo. Masi mukhale ni Masu awo, vatthu vahikhanle-vo hat’etthu enlamuliwa. “Khiyaavo ehukumu w’ale ari mwa Kristu Yesu, ahineettela makhalela a erutthu masi aneettela makhalelo a Erooho.” Erooho eneettiherya ni Masu, okhala wira Erooho enwerya paahi okhuma mwa Masu, okhala wira Masu Awe ti Erooho. Ni Eyo enwerya paahi. . . Erooho y’ekeekhai ya Muluku enwerya olavula Masu a Muluku paahi. Oh, wulu! Wulu, wulu!

Khumani, olumwenku. Satana, munihye.

²⁰⁰ Muhoove wiirela mwaak’ola, “Othaame-vo.” Muhimye. Mulipe, nwehe okomowaka. Ti yeeyo.

²⁰¹ Masi mwakhalana olamuliwa vo, vanreerela—vanreerela mukhale oomaala. Munkwakwaruwa mwaano paahi nto. Nyuwo khamunihimya ekeekhai. Nyuwo khamunihimya itthu saatthuneya wira muhimye. Vaareera.

²⁰² Hiyo ninnoona nto wira Yoxuwa, vaamanlyaawe ovira mowehereriwani mmwe, owo aahoono eyooniheryo ya muttetthe wooreera, ni aaheemela iwe oKadexi-Barne ni aahiisinliha mwaha wa awo othene, ni khwira, “Hiyo ninniweriyaxa okuxa. Ninoowerya okuxa.” Tuuvi waari muupuwelo ene? Olapuwa.

²⁰³ Muupuwelo wa Moise waari exeeni? “Mooniherye ethooneryo ela ni mwaakumihe aana.” Ni yaakhala ntoko yaahivonya. Masi owo aahikhala ni Masu, ni mukhora wa Ephareya Yookhwa khiwaawenrye onvarelela. Owo aahikelela ohoolo ni yeeyo. Owo aahikuxa mukhora wa nwanani.

²⁰⁴ Yoxuwa, anwehaka natiri a Muluku, khwira, “Hiyo ninniweriyaxa okuxa.” Ti yeeyo. Vano vakhuruwenlyaawe oYordani, owo iirale exeeni? Waahihapuwa. Amen. Ti yeeyo. Owo aahikuxa mukhora wa nwanani. Yordani ole waammukhoottiherya owo orowa omukuxa natiri ule. Masi vaphiyalyaawe iwe, owo aari Osuulu w’Abrahamu. Mwaha wa xeeni? Owo aanaamini Masu a Muluku. Ti siiso paahi munweryaanyu okhala Osuulu wa Abrahamu, waamini Masu

a Muluku. Vano nto owo iirale exeeni vaphiyalyaawe mpakha nipuro owo aaryaawe oolikana wira amukuxe nwanani? Muluku aahihula mukhora, vano owo khuxintta, khukuxa, khuvira.

²⁰⁵ Okathi ekhotto yoopacerya, ekhotto awe yoopacerya owo aarin'awe ni awo, makokoro yaari maalupalexa yaaweryaaya wiikarana ni ikaaro vasulu vaya. Owo onrowa okela sayi wira aavare? Awo yaahimutthyawa, khutthikela muhina. Nwanani onoothyawa, nave. "Masi nyuwo munookuxa mukhora wa nwanani."

²⁰⁶ Khwira, "Pwiya, kiireke-ni?" Owo eettakasa weiwe, oxekuwa owo, atthokelelaka. Owo aahimoona Mulopwana mmosa eemenle ni xoowa Awe akumihawe. Yoxuwa khumukumiha xoowa awe, khwira, "Nyuwo mwa a hiyo? Nyuwo mwa a nwanani ahu?"

Owo khwira, "Miyo ka Mukhulupale a anakhotto ala."

"Kiireke exeeni?"

²⁰⁷ "Mweettelele, imaara muloko ni tthaaru. Murumihe nlope. Munookuxa mukhora wa nwanani."

²⁰⁸ Owo waahimora. Ayo, mulopwana. Mwaha wa xeeni? Owo aari Osuulu w'Abrahamu, aasuka Masu a Muluku. Owo aahikuxa khula mukhora waamurweenle. Vekeekhai.

Onimwiila. Kihaana ohiya.

²⁰⁹ Nwehe, anamwiivaha ala othene oothamaleya, kihaana nikukhu noosareya yaawo alempe va. Masi anamwiivaha ala othene oothamaleya, itthu awo yiiranse aya, vookiserya awo yaahikhwa.

²¹⁰ Masi nto khurwa Osuulu w'ekeekhai wa waamini, Osuulu w'Omwele wa Abrahamu, Yesu, natiri. Abrahamu aahikhalana Isakhi, eekeekhai, a erutthu, masi Osuulu w'ekeekhai khuwaakhanle mmweettiheryoni mmwe wa mutthenkeso. Waari muhina mwa natiri ule a Masu a Muluku, wira Owo aarowa omukhaliha tiithi a maloko, kahi mwa Isakhi, masi mwa Osuulu w'Omwele, Yesu. Ole waari Osuulu w'Omwele, yoowo, vekeekhai, Osuulu w'Abrahamu, Yesu, khaari muYuta, nnakhala khaari Mmalapo. Owo aari Muluku. Munnona? E . . .

²¹¹ Nyuwo aKatolika va, mureerihawe. Masi mwaamukokhorelaka Maria ntoko muluku muthiyana, exeeni eniwiirani, khula enamuna? Maria khaari hat'etthu woohikhala muthiyana. Muluku aaroomuthanla. Owo aari ekaruma yoowuuramela. Ti yeeyo tu. Ekaruma yoowuuramela, ti yeeyo muthiyana okhanlyaaawe, masi owo ontakanxana ni epyo ya mulopwana.

²¹² Masi, ola muthukumano wootakanxeya, masi kihaana ohimya ela wira mwiiwe saana etthu enihimyaaka. Vano, nyuwo munnimwiwa awinyu-meetiku anyu, ni miyo ka munn'inyu. Vekeekhai, pooti.

213 Maria khaarina ekhitta mwa Kristu. Khiwaakhanle hata moonelo w'ekhapa okathi Erooho Yoowaarya emukhuneenly'aya ni eruku aya, nnakhala vakhani. Masi Muluku Oowerya sothene, Mpattuxa, aahipattuxa erukuruku y'Ephome ni ekhitta. Hum! Vakhala wira yaari ekhitta ya Maria, weeso alipa-ookhwa kxanihimuwa.

Ovuwa! Eyo erwiiye ekithi. Kinoomalaru ovara.

214 Nto mwaahimyaka wira khivanvirikana, etthu eniiraahu, vano Muluku onihimeeryenle-ni wira niisiinaneleke ithu sikhanelle soonanara? Muluku ohihimuxenrye-ni erutthu ya Yesu, vaahikhale siiso? Tivo, moone, khivaaweryaneya okhala muthiyana oophitaana ni yeeyo. Vakhala wira aahikhala, vano erutthu Awe vootthariha erutthu ya ame Awe, Maria, okhala wira awo yaahikhalana oophitaana w'ekhapa ni erooho yaakhuneelaka yaairihale o—okumiherya ekhasa, ni yoovonyeya. Erooho Yoowaarya, ni erupalelo yoohipahuwa, aleluya, vo Owo aapattunxe ekhasa ya mulopwana ni ya muthiyana.

215 Yesu aahimwiihana “maama”? Mphwanye mwa Yoolempwa. Owo aamwiihanne “muthiyana.” Aleluya! Muthiyana! (Eyo esya. Tivo eniiraaya siiso.) “Muthiyana, mwan'inyu owo.” Ikilomo imilyawu vakhiviru va yoowo ovikana Owo saaryaawe.

216 Owo aari Muluku. Owo khaari hata muYuta wala Mmalapo. Owo aari Muluku, soopiili ethayi ni erutthu, Muluku akhalaka mwa Yoowo. Muluku akhalaka mw'ekhasani ya muthiyana? Khivaaweryaneya okhala. Ekhasa eyo ya muthiyana yaahaana okhalana-vo etthu ni erutthu ahu. Masi yaari Ephome ni ekhasa, Muluku aakhuneenlyaaawe ni eruku.

217 Owo aamuwerya ohela veexaani aatthunne-ru. Ayo, mulopwana. Owo aamuwerya ohela khula nipuro Owo aarowaawe otthuna.

218 Masi Owo aaruhenle mwaha wa muthiyana okhala moomorani. Vo aahikhuma Mwaana oohipahuwa a Muluku mukumi, oopattuxiwa, ooyariwa ni harus, erutthu ni munepa.

219 Xeeni Davidi akelaka wira, “Nkinrowa omoona Oowaarya Aka . . . omuhiya Oowaarya Aka wuntta, Oowaarya Aka wuntta. Nnakhala nkinihya munepa Awe mookhwaani”? Davidi oohimya eyo. Munnona? Munepa, erutthu, ni erooho, sipattuxiwe ni Muluku, ni Yoowo.

220 Muthiyana khaari maama, aari muthiyana. Kookupali wira aari muthiyana oreera murima, oowaarya, vekeekhai. Owo khaarowa wira okhanle-ene ekaruma yoowuuramela, Muluku khaarowa othanla ekaruma yoowuuramela yoohifayi. Apwiya yatthuna vale, kinoolaleya yeeyo ohiy'ula. Masi—masi khwira, “Ekaruma yoowuuramela yoohifayi wira emuruuhe Awawe—wira emuruuhe Mwan'Awewe mulaponi? Owo aamuthanlale harus, ahaamusuwenle mulopwana.” Owo nnakhala khaakhalanne eyecheeriwo ya ekhasa, wala etthu ekina, okathi Erooho

Yoowaarya emukhuneenlyaaya ni eruku, okhala wira, Muluku, mwa enamuna Awe yoohihononeya, yoohimala, aahipattuxa mwa yoowo, munepa, erutthu, ni Erooho ya Yesu Kristu. Ti yeeyo. Owo aari Mwaana a Muluku ooyariwa ni harusi.

²²¹ Eyo yiirale exeeni? Epwannyunle mukhora wa nwanani. Aleluya! Whish! Ela enikhala yooreera, wa miyo. Nkawehani. Mwaha wa xeeni? Owo aahipwanyula mukhora wa nwanani vaavale vale, wira khula mutthu oniyariwa molumwenkuni mu mwaha wa otthuna wa ekhapa, ahaawerya orowa Wirimu okhala wira ekhapa t'epacenrye yeeyo wopaceryani, omatta w'Edeni, yeeyo yaaikhuneelenle-aya. Owo vairalyaawe yeeyo, aahipwexa etthu ile ipantte piili vaavale vale, ni khukuxa mukhora wa nwanani. Ni xeeni? Mwaha wo okuxa Osuulu w'Omwenene wa Abrahamu, emaara yoopacerya, khunnyakattela vathi. Osuulu w'Omwenene wa waamini ni natiri, kahi muupuwelo wa Maria, masi wa Muluku, woopwanyula mikhora. Eyo ti, ennimutthuniherya mutthu ovira vamukhora. Avuwihwe Muluku!

²²² Owo iirale exeeni? Vano ookuxa mikhora sothene sa nwanani. Owo ookuxa mukhora wa eretta. Eretta khiyaawerya okhala Ohoolo Wawe. Nnari, mulopwana. Nnakhala etthu ekina khiyaawerya okhala Ohoolo Wawe. Muteko wo ovitha khuwaawerya okhala Ohoolo Wawe. Nnari. Owo iirale exeeni?

²²³ Yoxuwa aahikhwa. Moise aahikhwa. Othene aya akina yaahikhwa, masi kahi Osuulu ula w'Omwenene. Okhwa khiwaawerya okhala vatthu vaari Ekumi.

²²⁴ Muthiyan'ole a oNayini, akhumaka ni mwan'awe mulopwana. Aaheemela khwira, "Nvenye, mwan'aka."

²²⁵ Mwaaruusi ule aakhwiye, mwaana a Yairo, Owo aahilavula nuulumo nimosu wu molumwenkuni woohisuweliwa iwe, khwira, "Mwan'aka, nvenye."

²²⁶ Lasaro, aakhwiye khuvira mahiku maxexe ni erutthu awe yoowuntta, ni munep'awe waari ottaiwene wa yoowo, mwa mahiku maxexe. Owo khwira, "Lasaro, mukhumele ota." Ovuwa!

²²⁷ Owo ori vo. Exeeni Owo iiralyaawe? Owo ootaphula ikanyeryo sa itthu sothene. Aleluya!

²²⁸ Okathi Owo aarinaawe okhwa nto, Owo khaawerya ovarelela ekumi ile. Owo khaarowa wira okhwiye-ene, masi Owo aahaana ovaha ekumi ile. Nto okathi Owo ovahalyaawe ekumi ile, Owo aahivira mookhwaani. Ni munep'awe wooreeraxa, ntoko Bibilia sihimalyaawe, khukhuruwela omooroni, wira okuxe opuro aka ni opuro anyu. Osuulu w'Omwenene w'Abrahamu! Exeeni? Owo aari Osuulu w'Omwenene. Oh, ovuwa!

²²⁹ Vano hiyo na Osuulu w'Omwenene, ole, onkhala ni Masu, siiso ntoko Owo saaryaawe. "Maana wopaceryani naari Nsu, nto Nsu

naari ni Muluku; vano Nsu, khwiipaka erutthu, khukhala ni hiyo.” Khamunoono vari Osuulu w’Omwene? Osuulu w’Omwene ti ole onkhala ni Masu.

²³⁰ Nyuwo ootteettheya muntthuna okupali itthu sa xetwani, ni mihapo sawe sa molumwenkuni. (Miyo nkinlavula ni nyuwo va.) Ota iwo, nyuwo alaleyi munsuwela wira munlaleya wira mahiku a miiriirya aavira, munlaleya wira khekhanle etthu iyo ntoko opatiiso wa Erooho Yoowaarya, wuuliha muru, ni wiisihana Osuulu w’Abrahamu.

²³¹ Osuulu w’Omwene onikhala ni Masu. Osuulu w’Omwene, ohiyariwe ni mutthu, ehiri-vo etthu ya mulopwana wala muthiyana. Muthiyana ti ekereja; kheri-vo etthu ya ekereja. Maria khaarina-vo etthu ni Epyo. Nnakhala ekereja, yeeyo eniitthaniwa mutthenkeso, kherina-vo etthu ni Epyo. Eyariwe mwa exeeni? Kahi ya mutthenkeso, kahi Metotista, Patista, Prespiteriyano, Katolika, Luterana, ni sikina.

²³² Masi, oyariwe ni Osuulu w’Omwene wa natiri a Muluku, owo t’onikuxa mukhora wa nwanani. Owo ookuxeriwa. “Maana nyuwo mwakhala mwa Miyo, nave Masu Aka mwa nyuwo, nvekeleke etthu entthunaanyu, munimwiireliwa.” Eyo eri vo. Owo natirii. Ehiiriwa.

²³³ Munep’awe wooreeraxa waahikhuruwela omooroni, weiwo waatthuneyaaka miyo orowa. Masi mmurotoni mwaya mmwe. . . Sansoni akuxaka mukhora wa epooma ottuli wawe, khaarina-vo etthu ni yeeyo. Owo ookuxa mikhora sa omooroni, mikhora sa mahiye, ni itthu sothene sikina. Owo khoroihale mwaako osulu, masi oroopwanyula. Aleluya! Owo aahikuxa mukhora wa nwanani.

²³⁴ Mapuro yaasanrye owerya wa xetwani, osulu, hata Nlaikha nnakhala etthu khiyaawerya okhuruwa. Khivaaweryaneya okhala olapela, okhala wira ephome ya ipuri khiyaakumiha etampi. Masi Ephome Awe Yoowo yookumiha etampi.

²³⁵ Vano Owo oowela Wirimu, ohaakuxa ootthukweliwa. Owo onaavaha soovaha atthu. Vano, khula mmosa a Osuulu w’Abrahamu onthuna oliva ehisapo, orwa n’uttharuwa itampi saya, opatisiwa ni Nsina na Yesu Kristu wira muleveleliwe itampi sanyu, osarihiwa Erooho Yoowaarya, ni ovilela weeheriwa.

²³⁶ Nto wakumihiwa-ru olumwenku mwa nyuwo, itthu sironwe, sothene siri sootakhala, sothene sinooneya okhala soonanara, ntoko athiyana ni maihi aya, alopwana ni mweettelo aya, ni ikereja ni mitthenkeso saya, ni pa—ni pastore onrowa oniira sinthunaaya matiyaakono awe, ni—ni inamuna sothene iyo sa itthu. Nikhuru na molumwenkuni wala etthu siiso enkela-mo ni omoomoliha pastore, mukereja.

²³⁷ Mukeleleke ohoolo, pastore. Muluku ooreeriheni. Mukhale oolipa ni Masu. Muhikupali hat’etthu.

²³⁸ Owo oowela Osulu. Owo iirale exeeni? Owo oopaka mwiithe, mukhora, yoowo, mavekelo a Osuulu yoola w'Abrahamu. Mwaha wa xeeni? Mwaha wa xeeni? Hiyo nakhala Erutthu ya Kristu, vakhala wira nihookhwa, hiyo ninniisuupuwela okhala ookhwa ni oovithiwa mwa Kristu, ni ohihimuwa ni Yoowo woohihimuwani. Owo ti Muru wa Erutthu. Vaavo vari Muru, Erutthu eri ni Yoowo. Vano nto, voosiis'ula, vaavo khula mmosa oirale yeeyo, "ookilaathiki ni Yoowo mapuro a wirimu," ni Osuulu w'Omwene. Attotopeliwe Muluku.

²³⁹ Hata mikhora. Khamukhanle ovekelaka *mpakha* va, ni wira, "Oh, oh, nuulumo *nlo vo*." Huh-uh. Awo animoottiyelani, vaavo vo.

²⁴⁰ Masi murima ahu waahinilamuleke; naasuwelaka wira nineetta mwa sooruma sa Muluku; ninnoona makhalelo ahu oloka; ninnoona eyo; khula Masu Muluku orumalyaawe, hiyo ninnisuka Yaawo; vano mikhora sa khula nwanani sinnikuxiwa. "Vano nvekeleke entthunaanyu, munimwiireliwa." "Owo onookuxa mukhora wa nwanani awe." Oh, munna, ekereja xeeni yaarowa okhala eyo!

²⁴¹ Katthikelaru-tho oPhoenix, Apwiya yakitthuniherya vale, kinroromela, kavalowa-ru mutapernakulu mu, ikhukulu iya sikilaathiwe-mo, ni khula ikhukulu sa mweettiho wa Ehapari yooreera yoomalela mmuttettheni mu sikilaathiwe ni masantu a Muluku mukumi: yooneyeke okhala aKristu; elavuleke ntoko aKristu; yiireke ntoko aKristu; ni Erooho ya Muluku yeetteetaka eriyari aya, wira, mmosa aira etampi, Erooho Yoowaarya ehimye naanaanoru.

²⁴² Eyo enimwiira. Nyuwo munnoonaka eyo muliinyani mwa mavekelo, siiso ntoko walataari nno. Vaavo, eniiraaya, "Nyuwo mutthikele iwe mwalokihe n'aiy'anyu. Murowe, mwaahimeerye amwaar'inyu wira nyuwo mwaari, nsuri ohiyu, ni muthiyan'ole, mukilaanthi nipuro *khata-khata*." Eyo yaira-ru va, mweettaka mwa Masu, mwiiwaka Nsu nle noomaaleleya naamukhaani, Eyo enimwiira mwa nyuwo. Nyuwo mwa Osuulu w'Abrahamu. Nto, woohikhala etampi.

²⁴³ Mulaleyi, nyuwo khamwaatthuna woona yeeyo mukereja mwanu? Ovolowa mukereja mu, n'uwehaweha va, owoona alopwana n'athiyana, ooreera murima, oowaarya, ekilaanthe-ene vale oosareya owerya wa Muluku. Etampi khiyaarowa owerya okela. Mutthu onoovolowa khukilaathi, Erooho ovenya ni wira, "John Jones, nyuwo munikhuma epooma, *khata*, nipuro *khata*. Owo ori vaava wira ophwanye ovonihwiwa wa erutthu awe. Munnona? Owo aahiira etthu *khata* nipuro *khata*. Owo ohiira *ela*, ni ookuxa, ohaana ottikiha *ela*, olokiha *ela*, nto Muluku ononvonihwa kankuru uwo. SIISO ANIHIMYA T'APWIYA." Wulu, wulu!

244 Mukivahe ekereja, mukivahe axilopwana muloko, oosa- . . . , vekeekhai maniya a Muluku, Osuulu w’Omwene, mwaakhalihe axilopwana awo vamosa, nto nwehe etthu enrowa okhumelela. Mukivahe empa ela yaamukhaani yoosareya atthu siiso, nto kinooonihani Waarya olumwenku onrowaaya otthyawela. Ti yeeyo. Ti yeeyo Muluku onthunaawe wira hiyo nikhale. “Nyuwo mwa muttethe otekiwe vamwaako.” Nyuwo mwa Osuulu w’Omwene wa Abrahamu. “Owo onookuxa mukhora wa nwanani aya.”

245 Eretta, yookhala enitannya eretta. Nookhala niwoko nintannya itthu iya. Nto Muluku, Erooho Yoowaarya, eri vaava wira yuupulule etthu iyo ni wooleelani mwaha wa xeeni muhinaakhelelaanyu. Exeeni enniira? Khanirina wiikohaka, “Enimwiira ela?” Eyo enimwiira. Nyuwo muniira-ni?

246 Nkanweheni profeta owo. Owo khaaiwelenle ettheke enoopa n’ikuru, “Avuwihwe Muluku! Aleluya!”

247 Eyo ti yooreera. Vano, muupuwele, miyo nkinipwapwela yeeyo. Kinwehererya wira atthu othene anniiwa saana yeeyo. Ookhala mutthu iirale, “Munna Branham khonaamini ohimya wira, ‘Avuwihwe Muluku! Aleluya!’” Ahe, nkakiweheni miyo osulu nno vano. Miyo kinnaamini okhuwela, olavula ilavulelo, wiina Muroohoni.

248 Masi, munna, okathi nyuwo munvonyaanyu wiiwa Nsu nle noomaaleleya naamukhaani na Masu, eyo t’itthu enoovarani. Eyo t’itthu ene.

249 Eliya aanisuwela wira muhakalalih’ole wothene waairaneya ota. Masi owo aari. . . Khonamuvareke murima wira okhume. Masi vaiwalyaawe Nsu nle noomaaleleya naamukhaani na Muluku, vano owo aahivariwa murima. Nto aahikhuneela wiitho wawe, khukhuma. Mwaha wa xeeni? Eliya aari Osuulu w’Abrahamu, aatthara Masu.

250 “Nyuwo mwakhala mwa Miyo nave Masu Aka mwa nyuwo, vano nvekeleke etthu entthunaanyu, munimwiireliwa.”

Nrowe nuuramihe muru okathi vakhani paahi wira nivekele.

251 Oh, ekereja, moota, kaamalihaka olaleya siiso, moota onoonaka! Erooho enookihiya, nto kiniweha ottuli, Kinniwoona atthu vekeekhai yaarowa okela mpeesani mwaya ni yaarowa okumiha yoolya ya an’aya, wira ekivahe. Kinniwoona axithiyana amwaavano mu, khino ni maihi ookhuveya, awo yaarowa wira exeeni? Awo yaamwiira etthu p’itthu yaarowaaya owerya mwaha wa miyo. Mulopwana akhalaka ni mwaar’awe siiso, ni miyo kipwapwelaka ni Masu awo, kisikulihaka, muupuwelo awe ti woovolola, ni nnakhala vo mulopwan’owo aamurowa nno ni ovara muteko ntoko epottha ni okiveleeliherya sanamuloko sawe. Ti yeeyo. Nto eyo ennikikhaliha oowuuliwa muru, kitthikelaka mw’erutthuni nto, nyuwo munnoona, “Kihii—kihimmeye exeeni?” Nkintthuna osikuliha, kahi yeeyo.

²⁵² Masi, oh, munna, ni mwaamurokor'aka oophentiwa ni munna, vakhala wira awo Masu a Muluku, ni ela khukhala Erooho Awe ekhalihaka Masu awo ophwanya ekumi, wa nyuwo, enrowa okhala exeeni Nihiku n'Olamuliwa? Miyo kimpavela wookhalihani oolikana mwaha wa nihiku nlo. Xontte, xontte mwaakhele Masu Awe paahi. Miyo kakhalakhalaru kilaleyaka etthu ehikhanle Masu, natiri a Muluku, vano mookhalana ehakhi yo okileela. Masi ala Masu. Ni okhala wira kinnoophentani.

²⁵³ Kahi mwaha wo wira miyo—miyo nkinoottunani mmwaatiyani. Okhala wira mwaatiya khonrowa wookuxani mpakha epantte ekina. Nyuwo munoosama, nihiku nlo.

²⁵⁴ Muhaana ophiya Woolamuliwani. "Oottheke mwa ele ekhaanixa t'ottheke a sothene." Ni mwaasuwelaka wira ti yooreera wira etthu, awo Masu a Muluku ni natiri wira, vano khuhinaira, vano anki yeeyo? Munoovekeliwa wira muhimye mwaha aya, vano nto? Mutthaka ola voosiisu ula wakhalaru ohoolo wanyu muteelani, Nihiku n'Olamuliwa, vano nto? Muupuwele yeeyo, apatthani. Nyuwo pooti okhwa nihiku nihinatthi omala. Othene ahu pooti. Nto etthu emosa ekeekhai, munoorowa okhwa.

²⁵⁵ Miyo kaahikhala nihiku nlo kaawehaka ame aka, kaavarenle-ene mmoononi mwaka. Kaahaavarelela atithi aka okathi vakhani eyo ehinatthi, ni khwaaweha erowaka.

²⁵⁶ Kinniwoonaka ophiya wookiseryani w'ephiro, ale yuupuwela wira yaari saana. Aniira, "Oh, Munna Branham, oh, vaakhanle wira kaaniwerya okhala okathi vakhani-tho!" Vahooxa nto. Ni muupuwele, okhwa khonrukunxa munepa, onrukunxa nipuro naya n'okhala paahi. Nto moona wira etthu muhina mwa nyuwo, okhala yoothokeleleya vano, moona wira etthu muhina mwa nyuwo enniwiirihani wira siiso ni wona siiso, ntoko vahaatthuneyaaya woonaka, murukunxe murima voosiis'ula. Munnitthuna, mpatthani? Murwe. Mukhale... Khivanthuneya okhala siiso. Nyuwo mwa mutthu ootakhaliwa. Mukhaleke makhalelo eekeekhai a Osuulu wa Omwene. Muluku onnoottunani olelo.

²⁵⁷ Munnitthuna ovenxa ntata, muuramme-ene muru, ni murim'anyu. Mwiire, "Munna Branham, miyo kininvenxerya ntata naka Muluku. Vaxariya-vo, mmurimani mwaka, ti yeeyo kintthunaaka okhala. Vekeekhai ti yeeyo kintthunaaka okhala. Miyo—miyo koovonya va ni itthu sothene sikina, masi vekeekhai miyo—miyo nkinthuna okhala siiso. Kintthuna kikhale ele muhimmye anyu voosiis'ula. Mukivekelele, Munna Branham. Kininvenxerya matat'aka Muluku, kahi nyuwo, Munna Branham, masi Muluku. Ni mmurimani mwaka, Owo onnisuwela murim'aka, miyo kinnitthuna okhala muthinto wa muKristu nyuwo munihimyaanyu, Osuulu w'Omwene wa Abrahamu, mwa Yesu Kristu." Nvenxe ntata vano mwiire, "Miyo

ki...Mukivekelele, Munna Branham.” Muluku ooreeriheni. Muluku ooreeriheni. Vekeekhai Owo onoowiirelani.

²⁵⁸ Tith’ihu a Wirimu, Mowaaryani mwa Masu Anyu, mwa oweriya w’ohihimuwa Wanyu! Ni kinnisuwela, Pwiya, wira atthu oohaawa imaara sinci-ene aakhala ootikinihiwa va, mwaha wa soovi...Atthu onnaarikela osuwela etthu yo wira; mmosa onoorwa, ahimyaka etthu emosa; ni mmosa arwaaka, ahimyaka ekina.

²⁵⁹ Ni oPhoenix nno, epooma ela yuulupale ya—ya, ahe, maturista, vaavo ithu sothene sa elapo yothene sinrwaaya omalela-vo, veerutthu ni mwa erooho. Keemenle-ene vamwaako, nihiku nlo, ni kuupuwelaka imaara kavi Nsina na Muluku niromoliwaaya veethiru nihiku nimos a wenna, mararuwo makavi yiiriwe, etampi kavi ni soonanara mphironi mu, ni ipaare ni anamuhapaliwa, ni sothene, anci-ene aya ahimyaka okhala alipa-oowaamini, aKristu!

²⁶⁰ Athiyana yeettaka mphironi, ni sikaro mmatatani mwaya. Yeettaka n’ikuwo soohifayi, Nyuwo muhimmye-ene wira sinoowunkheryani ohoolo Wanyu, “Ti yoothanyeya,” ntoko nipuro ninrusiwa-vo, noonnyakhuwa, noottakatta, noowunkha nipuro nlo. O Muluku, vanweryaneya sayi muthiyana onihimya okhalana Erooho Yoowaarya wira etthu ntoko eyo, ni osuwela wira mphulani mwa Moopoli, eyo eninkha siiso, eyuntte? Vaaweryaneya sayi Owo okhalana etthu ntoko eyo Momweneni mw’Awe? Tithi, awo yaasuwenle paahi, wira ari ikilomo emilyawu wa Yeeyo.

²⁶¹ Miyo kinnivekela, Muluku, mmoriwe ikharari. Khaavo onthuna orowa mapuro ale a oopweteya. Khaavo onthuna orowa iwe, Tithi. Ohikhale hata mmosa a hiyo onrowa. Nnya muhina mmwe wookhala murima wooreera mwa mutth’uwo, mulopwan’owo, muthiy’an’owo, mulopwana wala muthiyana okhanle oothunku ni oophenteya ni ooreera murima, nave ootothiwe ni xetwani. Xetwani t’oirale eyo.

²⁶² Satana, miyo kinnoovirikanyani, okhala wira nyuwo mwa nwanani a Pwiya’aka. Nyuwo mwa nwanani a Masu Awe. Ni miyo kinnoorumani, mwa Yesu Kristu, Mwaana a Muluku, ntoko mutthu onookhwa, kisuwelaka wira nkirina oweriya mwa miyo. Nkirina oweriya wo oweemexani. Nkirina oweriya wo omwiiriha khula mmosa wa athiyana ala wiikukuttha, khula mmosa w’axilopwana ala, aniiwa efiita ela, wala—wala nipuro pi nipuro. Nkirina moota wo owiiriha wira yiikukutthe. Miyo ka oohiwerya. Masi kookhalana ehakhi ya Masu a Muluku, ntoko murumeyi, wira kilaleye Yaawo, ni ooluttana wa muteko wa ehakhi yeeyo. Nnakhala mupiliisa ola va khorina oweriya wo weemexa ekaaro, masi owo ookhalana ehakhi yo wira.

²⁶³ Ni, Satana, vanreerela mpacerye olumanyiha itaravawu, okhala wira kinnoorumani, mwa Yesu Kristu, wira mwaahiye

atthu ala, mulaponi mothene, mapuro othene Mutthak'ola onrowaaya. Mwaahiye. Miyo kinnaatthuna, okhala wira awo aathummwa. Awo kahi a yaawo mmansaya. Awo aathummwa ni ehisapo, awo ti Osuulu w'Omwene w'Abrahamu, Pwiya Yesu.

²⁶⁴ Nyuwo ootakhala, oottakatta, namirima miili oowunkha, namaawoka atthu, nweetiheryaka voozona mulittini wa omooroni, mwaahiye. Miyo kinnoorumani, ni Muluku mukumi, ni Mukuttho wa Mwan'Awe, Yesu, wira nyuwo mwaahiye, wira minepa saya sisareye eparakha Awe ni Mukhalelo Awe, wira awo ewerye okuxa mukhora wa khula nwanani. [Nipuro vahiitthu mufiitani—Mol.] Nyuwo munaakhaliha elipelelaka *ela*, *ele*, wala *ekina*, wala mukwannyeryo woowaarya, wala etthu ekina, masi kinihimya wira onimooopweteyani oruma.

²⁶⁵ Vaaweryaneya sayi eretta weemela mwa mureeriho ntoko ola? Okathi awo anikhoottaaya paahi onweha natiri epantte ele ntoko tiithi Abrahamu saawehalyaawe, okathi waawenryaawe omoona Owo mwa ethoonyeryo miyaakha imiya ottaiwene, arwaaka.

²⁶⁶ Mwaahiye. Mwa Nsina na Yesu Kristu, mwaahiye atthu ala.

²⁶⁷ Owerya wa Muluku, maiwelo a Masu, okathi awo anrapihwaaya voosiis'ula ni Yaawo, wira maiwelo a weettela Masu a Muluku ni anatiri Awe eekeekhai, evarelo ehinweryaneya otthikiliwa ni Satana. Wira khula mmosa anvarele natiri uwo, ahimiyaka wira, "Ti Yoowo. Miyo kininvarelela Yoowo. Muluku oommana natiri. Miyo ka osuulu w'Abrahamu. Kinwerya sayi omuhoverya natiri Awe?" Ni okelela ohoolo, mwa Yesu Kristu, Pwiya'ahu. Amen.

Miyo kinnimpenta Owo . . .

²⁶⁸ Waari woothikila voosiis'ula, apatthani. Nrowe nikokhorele vano voomaaleleya.

Okhala wira Owo t'opacenrye okiphenta

Nto oothuma woopowa waka

Vamwirini w'oKalvario.

²⁶⁹ Vaamuweryaneya, kahi voohitthokelela, vekeekhai nnari . . . Ela ti—ti y'etiini. Nrowe ninvenxerye matata Yoowo onimpentaahu. Nto niire:

Miyo kinnimpenta Owo, miyo kinnimpenta

Owo

Okhala wira Owo t'opacenrye okiphenta

Nto oothuma woopowa waka

Vamwirini w'oKalvario.

²⁷⁰ Vano, wa khula muthiyana wala mwaaruusi mu, nla ntata naka. Muluku onnoophentani. Wa khula mulopwana wala mmiravo mu, Muluku onnoophentani. Miyo kinnoophentani. Vano, nkikhanle wookolaka moonoo ni ovara ntata na khula mmosa a nyuwo, masi Muluku oohimeeryeni etthu enihimyaaka.

Niipaka-tho nenlo, murukunuwe nvahane ntata ni mutthu.
 “Mwa yeela atthu othene anoosuwela wira nyuwo mwa awiixutti
 Aka, mwaaphentanaka, mmosa ni mukhw’awe.”

miyo . . .

. . . oothuma woopowa waka

Vamwirini w’oKalvario.

Miyo kinnimphenta Owo, miyo kinnimphenta

Owo

Okhala wira Owo t’opacenrye okiphenta

Nto oothuma woopowa waka

Vamwirini w’oKalvario.

²⁷¹ Khamunimphenta Owo? Moonelo ole woosivela wa Erooho
 Yoowaarya! Masu muteko wo okukuttha, onoolokihani,
 onookhalihani yoopattuxiwa esya, onikumihana sothene. Masu
 t’owiithaxa onvikana xoowa oniitha nno ni nno, alyihaka
 masoma, ethikilaka itthu sothene sa molumwenkuni. Munnona?
 Nto ninnoona okhala oothuwa, oorapihiwa, nikupaliki ni
 nimwaaminiki Yoowo. Tivo ninweryaahu wiipa:

Miyo kinnimphenta Owo, miyo kinnimphenta

Owo

Okhala wira Owo t’opacenrye okiphenta

Nto oothuma woopowa waka

oKalvario.


²⁷² Kahi yooreera? Miyo okisivela eyo ni murim’aka wothene.
 Munnona? Nrowe nehererye-tho yeeyo, atthu othene vano,
 tthiri, ni ikuru sothene vano.

Miyo kinnimphenta Owo, miyo kinnimphenta

Owo

Okhala wira Owo t’opacenrye okiphenta

Nto oothuma woopowa waka

oKalvari . . . o 

62-0121M Nto Osuulu Anyu Onookuxa Mukhora Wa Nwanani Aya
Tapernakulu ya Waamini
Phoenix, Arizona wAmerika

EMAKHUWA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Olopola mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinvwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyawe musurukhu vahikhanle n'utthuniheriwa woolempwa ni Voice Of God Recordings®. Mwaaphavelaka wiiwa-tho wala ikaruma sikina sikhhanle, xontte mulavule ni:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org